



上海图书馆藏书



A541 212 0008 1932B

# 談丹崖先生紀念冊目次

- 一、遺像
- 二、像贊
- 三、題詞
- 四、年譜
- 五、治家
- 六、言語
- 七、處世
- 八、待人
- 九、興業
- 十、理財


均以收到先後爲次序



十一、 教 育  
十二、 慈 善  
十三、 總 述  
十四、 哀 詞

談月崖先生遺像

李經畬拜題



談丹崖先生留學日本時遺像



江 南 高 中 兩 等 商 業 學 校 銀 行 科 實 踐 室 師 生 合 影



靜深之學幹達之才匪克市隱  
寔阜民財昔忝通家亦洽隣比  
常嘒國屯鬱茲偉器井甘先竭  
膏明以煎典刑究在惜哉此賢

丹崖賢友遺象

陳寶琛題





資彼計學振我商業興利  
惠民精心毅力嶽嶽風裁優  
優成績胡天不吊忽焉徂謝  
載瞻遺像同聲嗟惜

丹崖仁弟遺照 朱益藩



丹崖先生遺像贊詞

淮泗流域孕育英賢武功所賴文  
化所源民族革命此為最先吾友  
談君誕生其間學有本末才更兼  
全深研經濟創業艱難育務發展  
遠及瀛寰積而能散澤霈弘寰江  
北慈幼教養成全忽焉雲逝全國  
惜焉遺容宛在如三韓

焦子



其度偉然而岸異其氣穆然而內充其才智則精朗以應其德性則勇毅以首公故其儲於學識也如良金之入冶而明鏡之懸胸藪為績業也綜五都筦其穀溝萬國使之通由是而茲揮光大經營籌策納群流以就軌巍峩為南北都市之宗今君浩然長往而顧瞻遺範群仰為千年大陸之談翁嗚呼若君者是抱管商拯時之碩畫非侈陶猗致富以稱雄也

丹崖先生遺象

愚弟傅增湘拜贊



丹崖仁兄遺像

肝膽照人

宋子文敬題



丹崖先生遺像

壯節如在

黃郛拜題



天挺明哲

絕類超羣

控物自富

在邦必聞

酌劑盈虛

金融是賴

君實勗之

造端宏大

羣策羣力

締造經營

十有餘載

展也大成

奕：英姿

真人天際

遺像常留

儀型百世

丹崖仁仲遺像

恕兄龔心湛敬題



丹崖仁仲冥鑒

南朔迴翔五十年才名藉藉冠時賢  
不貪自識金銀氣屢中堪登貨殖篇  
樓記孰期天粹名極書差幸子能傳  
却思腹痛平生語一過黃墟一泫然

龔心湛拜執

江淮霸秀

鍾毓談公

擘精經濟

馳譽寰中

金融調劑

告厥成功

邦家倚重

社會欽崇

年未周甲

何遽考終

忝叨葭末

永慕音容

丹崖十哥親家像贊

李儒敬題





丹崖先生像贊

孝友其躬，俠義其性。人推貨殖，我欽儒行。何期鼎盛，忽驚  
旦化。肯構有人，游僊遽駕。文  
游卅載，肝膽相傾。遺容瞻悼，  
老淚縱橫。

子靖弟胡元俠



丹崖先生遺像

鞠躬盡瘁而死  
肝胆照人如生

胡適



丹崖老友像贊

徐佛蘇哀題



丹崖談公 天縱睿聰 嶽降無錫 負笈留東

商校先進 學科博通 骨奇貌挺 識卓才雄

訂交卅載 早仰英風 結社聞政 救國効忠

踈朝挾策 分部課功 南宣木鐸 北領金融

銀行邦聯 幣府制同 平民計相 大陸主翁

志業畢展 精氣內空 已得哲嗣 何勞親躬

心違佛理 病起魔叢 秘知異叟 術可還童

我決走告 君胡命終 儀容在上 悲悚奚窮

音塵不接纔三月患難相  
從盡卅年來日何堪思往  
日已經幾夜損清眠

丹崖同學千古 癸酉仲春

前溪吳鼎昌敬題



志同道合求之似難而我與君若切肺肝生自里閉中以媿成結  
如連鑣敢忘所歷各勤志業並勵歲時為趨一途載膏載脂以君  
生平爭高才地尤其難者勇於任事緣此成就乃見厥長所秉獨  
厚姿貌固強已振高遠方圖來軫僅而及茲遽嗟道盡況在今日  
國難當前天恤斯人或假以年不徒吾黨冀其有此中道相違胥  
曰已矣以故遺憾為感如何所能慰者子好孫多淮水流長跡池  
山遠莫謂精靈千秋不返

丹崖十兄遺象

弟作民謹贄



丹崖尊兄 象贊

卓哉丹公

名震寰中

風裁整峻

氣度雍容

經濟宏謨

克奏膚功

提倡教育

培植才英

道義論交

於茲世冬

清潭知己

雅量如虹

胡天不吊

鄉音絕空濛

瞻彼遺範

永式高風

愚弟王固磐敬題

楨榦之選并介之門邦  
儲民力擘畫殷繁國華  
人望宅心彌敷翳歟

談公天道寧論載瞻遺  
像我心煩寃黃泉碧落何  
處招魂知遇之感永矢弗諼

丹崖仁兄姻大人遺像 弟姚兆拜題



丹崖先生贊詞

鱣鱣談君

淮海之秀

計然學精

賜也業厚

廣事惠施

多所成就

有顯於時

亦裕厥後

意氣論交

聲容條質

輟瑟興悲

贊言懷舊

李光啓謹撰





丹公總理 像贊

繫維丹公 蓋代之雄 悃悃其德 藹藹其容  
教育先進 經濟博通 恤鄰慈幼 桑梓推崇  
業成大陸 譽滿寰中 職團倡導 建樹彌宏  
追隨八載 志合道同 五言垂誠 策勵事功  
作述有子 佐理金融 貽謀燕翼 孝友家風  
胡天不吊 賈志以終 載瞻遺像 仰慕無窮

愚弟楊時泰敬題



於鏢我師 載道兢兢 六物三事  
經綸宰商 服德師門 爰揚是航  
本學為用 億中業昌 豈熙諛陋  
暨績鱗筐 素詹遠像 涕泗禱禳  
永垂懿範 邦家之先

丹崖夫子大人遺照

江南高中兩等商業全體學生敬題

丹崖夫子大人像贊

淮水之霽 隄山之英 誕生賢傑  
利濟斯民 黃黻不貴 白圭是遵  
功在九府 德宏六行 胡天不慙  
殲我國楨 載瞻遺像 涕泗縱橫

麥業方棟拜題

丹崖先生紀念冊  
風悲千古

弟錢永銘題



丹崖如元千古

嗟公作古歲序倏遷換  
時傷逝振觸萬千積  
厚流光蕭規奕々慄茲  
典型精誠無格

甲戌春如弟許福晒拜頌



# 嘉惠後學

丹崖先生提倡教育夙具熱忱曩為國  
立東南大學募捐圖書公方執平津  
金融界之牛耳登高一呼集成鉅款東  
南分設上海商科公被聘為委員並為  
贊助私情公誼感佩良殷遽歸道山曷  
勝愴悼用題四字聊彰明德云爾

中華民國二十二年十二月 郭秉文



身稽及致兮初操歟仰惠之靈秀兮豁之悠揚適時充后  
兮訛就仁羊卜居誰上兮披葉日昌特出先生兮憐文  
章將昭厥祖兮來儀鳳台玉邊聖訓以濟人惟財兮此乃  
先生出方脩黌舍以申禮教兮如非君子之堂立崇樂  
鴻兮山高水長澤流永式兮百五墮祥天胡不弔兮慙  
人其卷瞻仰遺徽兮我心悲傷

丹崖先生

哀辭

愚弟許脩直



談君丹崖以世家子習勤苦敦行而力學守先而  
待後其度偉然其氣沛然其志卓然故其績於  
學而著為業炳然為舉世之所崇顧此猶闕於外  
而昭於時者若君之不以私害公不以義徇情處  
高華而不忘淡泊踈豪貴而不遺清寒又嘗  
謂任事須實心脩己須虛心人生須知足求學  
須知不足片言微行皆深合夫古昔懿訓雖不  
見於今之世也吁不可及已乃今追溯聲容已成  
往哲天道福善云何哉

汪士元





紀事

吳昆吾

予交丹崖在清光緒末年時兩江總督在金陵設立江南高等學堂予與之同學其間又同習日文丹崖日文尤佳咸推為班長嗣畢業離校彼此相睽違者幾十餘載民國十年春予自華府會議歸國過滬適與丹崖遇丹崖已經營大陸銀行辦有成效把握甚歡其後予返故都丹崖來訪勸為所辦銀行作一臂之助當是時予以職務羈身未能擺脫遂辭謝之同在故都遂時相過從丹崖勸予購五年公債謂厚利可操左券如其言後竟獲倍徙乃益服丹崖之卓識予之信託大陸銀行至今猶未斷絕者丹崖為之介也不謂歲月幾何而丹崖已不復游人間世矣人琴俱渺往跡難尋間山陽之笛而興悲過黃壚之墟而抱痛古誠有之今亦云然攬筆記此不禁唏噓久之

民國元年之十七年余任平津衛戍部餉事  
因晉鈔兌現乃以津開庫券持撥衛戍軍餉  
等事在平市商會與大陸銀行前總經理談  
丹崖先生初以暇談見其發言慷慨力持大  
觀心甚重之旋長津市以凡百設施首重財  
政若不統一難言建設商諸先生允為幫忙  
其時主津行者為許漢卿先生齋少芹先  
生副之均奉公忘私極力相助因以大陸銀行  
代理市庫其後公對於津市一切進行凡有  
所見必來相告持論明通多中竅要裨益  
於地方公益不少余卸職時值非常事竣  
之際公由平專來慰問其愛護朋友之真  
摯有如此者聊書數語用誌不忘時中華

民國二十二年十二月崔廷獻



余交丹崖垂二十餘載回憶  
大陸銀行創辦之始朝夕與  
共其樂何如丹崖今竟中  
道委化且一稔矣往事如  
夢不堪回首爰綴數語  
以誌哀悼

嗚呼丹崖志同道一  
大陸肇基實費心力  
惟我二人情投意洽  
昔在金陵締結金石  
儻終年徒為人役  
感及身世須自創業  
設計經營無間晨夕  
爰集十人分工合作  
克展鴻圖成裘集腋  
君逞其才名聞南北  
銀行界中推為巨擘  
溘然長逝同聲一哭  
大志已成大業已立  
雖死猶生功德不滅  
我愧無能家園邈跡  
徒有虛名毫無成績  
追憶往事歷歷在目  
斯人云亡夫復何說  
丹崖仁樞夫人千古  
友棠王桂林好題

以商科之學生從事銀行  
事業以總經理而終何足以  
云紀念然此所論於丹崖  
也成立。銀行在尋常事  
任。總經理亦尋常事  
丹崖所論能而不貴者  
惟盡成兩字了。夫盡成原  
原分內之當然而不能盡  
成者固比皆是也。丹崖惟  
能盡成故其成績卓著惟  
其成績卓著故其死於積  
勞惟其死於積勞故其

死必紀念然則紀念丹崖  
以事豈可已哉世人之論  
丹崖者須知譽之者因其  
盡成而曰譽也毀之者因其  
盡成而受毀也。因其盡  
成譽固可毀亦可譽固  
當然毀亦分內事審知丹崖  
者以為如何

甲戌李善濟雙元拜識



# 錫金談丹崖先生年譜

前江南高中兩等商業學校學生謹輯

清光緒六年庚辰十一月十二日寅時

先生生於江蘇淮安府城內城隍廟巷廂中是時 先生大父靜山觀察由四川辭官東歸僑寓淮上 太翁篤生太守方隨侍遂卜家於此

七年辛巳二歲

八年壬午三歲

九年癸未四歲

十年甲申五歲

是年秋何太淑人口授方字每日四字以爲常

先生記性甚強兩月後增爲

日授八字未及年終 先生已識字逾千

十一年乙酉六歲

是年入塾從山陽王德甫先生讀

十二年丙戌七歲

十三年丁亥八歲

從安東朱學英先生讀

十四年戊子九歲

與胞兄味秋公從淮安馬鼎三先生讀初習爲試帖詩吐屬不凡馬師極爲稱賞

十五年己丑十歲

從侯官莫志南先生讀莫爲 先生表叔督課甚嚴 先生之學問乃大進

是年春 太守公奉差遠遊隴右

十六年庚寅十一歲

是年秋 先生初習爲製藝文 先生大父靜山公學問淵博晚年家居以課孫爲樂每晚家塾散學後必召諸孫詳詢日間所習并手訂晚課章程或誦或講或命題爲詩文月終親加審核定其次序成績最優者酌予獎品以示鼓勵其時 先生年尙幼頗知勤奮以故靜山先生特鍾愛之

十七年辛卯十二歲

十八年壬辰十三歲

從淮安顧先生讀

十九年癸巳十四歲

是年九月 先生大父靜山觀察逝世

二十年甲午十五歲

從淮安程左田先生讀

二十一年乙未十六歲

從丹徒魏幹青先生讀

二十二年丙申十七歲

二十三年丁酉十八歲

從盩厔路山夫先生習治古文及經世之學

二十四年戊戌十九歲

先生自甲午中日戰後慨國步日衰政變議起即欲近法日本明治中興之道乃商承太守公命與從兄勤生公糾合上虞羅君叔韞於淮安城內創設東文學堂以爲留學日本之預備當時風氣未開來者甚少先生躬自入學以爲



倡攻讀最勤每試輒冠其曹蓋 先生以學救國之志即立於此時矣

二十五年己亥二十歲

肄業東文學堂

二十六年庚子二十一歲

是年正月元配王夫人來歸六月北方拳匪禍起東文學堂因外國教員職去  
遂停辦

二十七年辛丑二十二歲

是年三月長女英生

二十八年壬寅二十三歲

先生自東文學堂停辦後即知專習外國文字不足以向海外求高深實用之  
學乃於是年二月考入南京官立江南高等學堂肄業

是年十一月長子光曾生

二十九年癸卯二十四歲

三十年甲辰二十五歲

是年三月 先生以優才生由兩江總督端忠敏公派赴日本入東京高等商業學校肄業注重經濟銀行之學當時我國實業未興國貧民弱 先生抱經濟救國之素志攻讀極殷學績亦甚優

三十一年乙巳二十六歲

八月元配王夫人歿於淮安

三十二年丙午二十七歲

暑假歸國省親六月葬王夫人於陳家集湖灘新塋

三十三年丁未二十八歲

是年六月自日本假歸七月繼配丁夫人來歸

三十四年戊申二十九歲

是年夏畢業實習於日本銀行旋回國應江督端忠敏公暨張季直先生之聘任江南高中兩等商業學堂教務長兼教習於高等部設銀行稅關保險師範等科創設銀行實踐室開國內商業教育之紀元延聘東西洋回國學生爲教習教科完備管理綦嚴海內稱譽當時諸教習皆爲現代經濟界名賢畢業學生亦多服務各省實業機關俱有相當成績 先生建功於我國實業即始於此

八月應學部試列優等授商科舉人

九月遭何太夫人喪

宣統元年己酉三十歲

二年庚戌三十一歲

三年辛亥三十二歲

是年春補應廷試以主事籤分度支部 先生志不在官適當時大清銀行正圖改革延攬人才乃調派大清銀行充稽核 先生之學遂得略爲展布凡改訂規章之處 先生建議獨多大都採用未幾軍務倥傯鼎革財政艱難迥異常軌南京臨時政府財政部長熊秉三先生以 先生供職大清銀行時素副幹才之名乃延往南京命管理軍用鈔票事宜時人多難之 先生昕夕規畫手定章制卒能上裕軍用下利民生

民國元年三十三歲

南北統一 先生奉命與時賢籌備中國銀行成立後任計算局長建立銀行會計規程改訂新式簿記並感會計人員缺乏另設簿記傳習所教練興革規

模大立至今銀行界仍沿用不衰

二年三十四歲

先生以前清度支紊亂爲整理財政之最大障礙建議組織國庫由中國銀行代理被任爲中國銀行國庫局長外採歐制內察國情於數月間創訂一切法則中國之國庫乃成綱舉目張粲然明備海內頌之並條陳整頓稅收嚴稽支出裨益財政尤非淺鮮

三年三十五歲

調任南京中國銀行行長維時政府正採用金庫制度勵行收回地方財政以蘇省爲我國南方富庶之區又值屢經變故之後責先生肩此重任先生亦毅然前往籌備設施備嘗艱苦卒告成功

四年三十六歲

先生籌設蘇州安徽等處支行辦理國庫軍政當局多以變更成例非之先生殫精竭慮從容應付次第成立蘇皖財政得由紛錯之中歸於統一

五年三十七歲

是年秋政府有令中交兩行鈔票停止兌現之命先生以事關國信民生力與當時金融界諸鉅子合陳利弊維持鈔信南方得免停兌之害

六年三十八歲

七年三十九歲

調任北京中國銀行行長時中國銀行規模宏大北京又爲政府所在地本行總管理處亦設立於此當局以先生爲創辦人之一功績最多乃調任以備就近咨詢先生整飭行務贊襄財政不可勝紀

八年四十歲

先生志在振興國內實業助展社會經濟力謀金融界與工商業溝通深知國家銀行基礎已固僅事於此不足發抒抱負得遂初衷爰集合同志創辦大陸銀行於天津北平

九年四十一歲

先生辭中國銀行職務躬任大陸銀行總經理明定以服務社會輔助實業爲宗旨設總經理處於北平事無巨細悉出親裁並以天津爲華北商業重心地定天津爲總行

十年四十二歲

先生致力於大陸銀行營業日形發達遂擴充資本增設分支行行譽頓起竟與國內各大銀行相頡頏

是年春 先生被選爲北平銀行公會常務董事興辦公益贊襄財政厥功甚

偉并辦慈善事業如難民婦孺救濟會粥廠等事市民曾製匾額以頌之

十一年四十三歲

先生以國內銀行單獨營業資力嫌薄乃與鹽業中南金城等行聯合共組四行儲蓄會準備庫營業更大進步時人以美國聯合準備銀行目之

十二年四十四歲

四月奉 大總統令派充全國財政討論會會員財政整理委員會顧問教育基金委員會會員北京民國大學聘任常務董事通才學校董事九月遣女英于歸餘姚曹氏

十一月丁 太守篤生公憂回淮哀禮備盡旋奉葬於淮安陳家集湖灘新塋  
十三年四十五歲

是年三月受北平銀行公會公推爲代表出席全國銀行公會聯合會會議於



漢口建議全國各銀行不得任意借款以息內戰全體通過時論稱之

十四年四十六歲

二月奉執政派充善後會議財政專門委員北京公民大學聘任董事又聯合

江淮同鄉創辦江北慈幼院於淮安救濟貧苦兒童數百人

十五年四十七歲

子光曾留學美洲十四年回國娶合肥李氏是年一月受教育部聘爲教育基

金委員會委員

十六年四十八歲

長孫沅生

堂兄仲武公之子慰曾於是年春畢業於上海復旦大學 先生甚慰蓋慰曾

自幼即受 先生教養於是乃慶成材

十七年四十九歲

受國民政府財政部之聘爲經濟會議委員并受湖南明德大學北平郁文大學北平貧民救濟會等處聘爲董事

是年八月國民政府發行津海關二五附加稅國庫券 先生被推爲庫券基金保管委員會常務委員主任

十八年五十歲

次孫永生

受教育部聘爲教育基金會委員北平特別市繁榮設計會委員自治討論會會員公益產科醫院執行委員江蘇同鄉救濟會委員新爾學院北平中學董事河北農田水利委員會委員

十九年五十一歲

北平武定侯住宅修葺告成接胞兄味秋公於平歡聚諭子姪輩不許稱觴祝壽誕晨爲大陸銀行同人所知設筵演劇 先生不可却乃命入夜聚歡力戒鋪張糜費午間仍到行親理行務一如平時

二十年五十二歲

受國民政府主席聘爲北平市政設計委員會委員整理北平文化委員會委員及北平民國學院校董

堂兄石衫公之子希曾畢業於北平燕京大學亦 先生培植所成也

是年十二月津海關二五附加稅國庫券基金保管委員會改組爲疏濬河北海河工程短期公債基金保管委員會 先生復被推爲常務委員主任

二十一年五十三歲

受國民政府主席聘爲全國財政委員會委員國難會議委員財政部聘爲平

津高等教育經費保管委員會委員江蘇省主席聘爲江蘇戰區救濟會委員  
前國務總理熊秉三先生聘爲中國國際聯盟同志會理事 先生積勞已久  
體質漸衰是年血壓增高手足麻木中西醫咸囑靜養親友敦勸家人環請  
先生每日事業上之責任太重安可畏死仍扶病治公未嘗一日自逸是年陽  
歷十二月十五日正在總經理處批閱文件忽感頭眩心悸左肢竟痿乃遷德  
國醫院就醫臨上車時覺神志復清尙與行中人員商酌行事入醫院後雖呻  
吟牀褥不忘公務每日必約重要職員相見裁決要件至此心血已耗盡矣

二十二年五十四歲

是年仍居德國醫院間延中醫調治終鮮起色二月廿二日以後神志陡變舌  
強不能進飲食延至二十五日下午八時壽終無遺言蓋 先生一生有公無  
私家務悉交丁夫人處理沒後清理財產與債務有負無盈經營銀行廿餘年

身後如此談者奇之

是年十月歸葬於淮安城東丁小社新塋並遷王夫人柩合葬焉

## 治家

公年二十一娶於淮安王氏婉淑宜家時公方力學闡內外事悉委諸夫人惜夫人早世遺一子一女尙未成年遽失顧復公愴惋靡已越年繼室丁夫人來歸夫人亦賢於內則而家事兼有味秋伯兄主持公旋留學東京未嘗有內顧憂迨內渡卽秉教政尋復從事金融三十年來家庭瑣屑殆無所經心惟於子弟之誨迪則刻不去懷見必有訓訓必曰光前緒克厥家端在植品績學求孟晉以亟圖自樹立忠信篤敬四字可以行諸四方無論事貨殖學干祿俱宜從習勤耐苦先之勿耽恬嬉毋以不勞而冀弋獲勿營投機以長僥倖心毋求苟達而貽巖牆憂趨向旣正邪誠自距小而獨善其身大而懋功在國莫不建基於此近年世變日亟公訓子姪尤勤謂時局多擾民生日蹙惟能守約者可以裕生機守約當更從勿耻惡衣惡食始而安分守己養廉寡耻處處實事求是尤爲居叔世競生存之機要應持之勿替子姪莫不懍懍聳聽令嗣公遠先生畢業於美國紐約大學歸國後公先令於大陸銀行閱歷經年旋就天津中央

銀行副經理之職令姪季貞先生從公事經濟者十餘稔今爲大陸銀行天津總行副經理又令姪在堂先生畢業於江蘇農業大學曾充天津屠宰廠廠長旋就綏遠省政府秘書現任綏遠印花稅局局長其餘昆仲行或於中國交通及大陸各銀行供職或方在大學肄業均屬敏俊有爲蓋姪輩於其趨庭之餘聆公訓爲尤多故所造者宏英材輩起不僅令嗣克紹清芬也公篤于孝友妣氏何太夫人先其封翁而逝公爲之毀瘠且以遊食四方不克晨夕侍椿庭尤引爲恨居北平十餘稔意切迎養封翁以畏跋涉弗肯遠出公年必歸省歸則依依不忍離必因公事家人再三敦促而後行太翁棄養公哀益切常迎伯兄北遊聯床夜話饒有姜家大被之風從昆季甚衆視之與同懷無間扶挈愛護無不備竭其誠有從兄字勤生者今之天津大陸銀行副經理季貞先生之太翁也少而英敏負大志才思出凡俗曩承公之封翁意旨在淮安設有東文學校公勸助籌畫並首先入校爲倡諸生乃爭趨恐後頓使錮蔽風氣爲之豁然一展時論美之推爲江淮教育之先河不幸勤生公年未壯齎志以歿公折翼之戚久而彌增曾題其遺照

原文附錄於後

哀敬交至之情溢於字裏行間每爲人道及猶復唏噓不寘其友于至

性有如此

公於姪輩護持與責望同其肫厚凡婚姻教育諸費無不有所拊助於其就學也則課成績特嚴入校者歲必以校中之成績通知書具告藉覘其進境何若尤不時誡之曰方今風氣丕變求學固不宜拘墟蹈習故常然務學維新務德爲舊勿染時習勿誤歧途諄切其言至再至三必其確有領會而能循率然後已故學子所造多逾常程要皆切用於實際者也迨已有成就更善爲之擇業室家生計復致其綢繆且時以其際遇縈縈方寸間優秀者獎勵之提携之如不及或有失責斥無稍寬假與己子若姪兒女有少孤者則飲食教誨尤備極恩勤雖有慈父母或不能相侔公素以肫純樸實取人其自修也尤切堅苦刻責終始一節常以早年居約深知物力艱難不可暴殄勤勉子弟曰惜衣者福惜食者壽適家有舊藏湯貞愍隸書一聯有惜食惜衣不但惜財兼惜福之句喜其意善裝諸聽事復書而置之堂前跋曰用以自惕並勗後昆云他如朱柏廬先生治家格言則令門人李政爲之寫於屏蔽又以整齊嚴肅四字榜其門旁及中外名賢零文瑣語凡有裨於心身者或銘諸器用或倩時人手筆而裝潢之以昭示子



姪其用心於修齊之道不亦淵乎深哉公固趨尙新學者而居家醅朴之風有如此公之所謂務德維舊蓋實以身作則也識者論其不僅資爲治家之彝訓其足以挽頽風厲薄俗亦可爲世模楷矣

附錄公之從兄勤生先生遺照題記

此我先兄勤生之遺象也先兄勵志篤學潛德闇行每慨然有家國盛衰之想自先世以來卽流寓淮安甲午乙未以後海內志士仁人羣以創鉅痛深思輸入文明以轉移世運淮安屏處大江以北風氣稍後先兄乃構講舍究東文准人思想賴以疏通荔孫末學膚淺得稍知求學途徑亦自此時始庚子世變益急鄉曲父老每以研究東西學術引爲大詬先兄一意孤行迄不爲動久之思以胸中所蓄見諸施行遂在江北利濟公司佐其贊畫竟積勞瘁質志以沒年僅廿九遺子繼曾年五歲是可痛也荔孫以壬寅年肄業江南高等學堂翌年遂奉派來東乙巳暑假歸省携稻孫誼孫兩弟來學稻孫弟以研究工業卒業歸國誼孫弟肄業東京美術學校荔孫則前在高等商業學校旣已兩年學廣途狹恐終無所獲惟自先兄沒後忽忽光陰

已逾四稔慨然知身世之無可控搏追懷今昔渺若秋空之雲俛仰徘徊真有無窮之感但願  
繼曾姪刻勵精進有以光大先兄之業而卒底於成是則先兄之遺志也而荔孫亦與有責焉  
嗚呼是可慨也歲在丙午荔孫記於日本東京

## 言語

公自幼好議論其後涉世日深見聞益弘博於事業教育諸大端凡所立言罔不根諸學識經驗而一貫之要皆不刊之論舉足爲世所矜式本編已以類紀矣卽其燕居宴飲或私牘往還之間凡有關國事若行務或涉於持躬接物之道筆舌所及亦多竅要語其用心之深實爲人所罕逮茲謹就耳熟能詳者掇舉之

公一生臨事無不先卓立定見而後斬然處置常語人曰當斷不斷反受其亂故凡有所措輒目無全牛奏刀立解無反顧也又謂無論從事何業非歷大艱辛不能有大成功而其過程正如於橫流逆湍中行舟不進則退其時苟不具有大無畏之精神兼不可嚮之銳氣終必卷於風濤而永無誕登彼岸之一日於事緒之紛拏難於析理者則曰盤根錯節必以單刀直入始可批導無阻頻年國勢日處於憂患之中公所膺艱巨益不可勝紀同人以棘手事進有所商公必先諳囑之曰凡事當求其在我處此非常之時須應以非常之智曲謀其所當爲而爲困

心衡慮迸奮熱血以共赴之此正其時至事之成敗利純勿先經經其衷而使慎至於意惟固非存僥倖試孟浪於其間也更不可畏難苟安或稍涉泄沓若敷衍否則縱能彌縫一時他日圖窮匕見事體不至於崩潰不止同人循其言而行所向輒利

公於要事有所研討莫不窮原盡委理充而詞沛無模稜之見無囿圖之語料事則每能燭照機先見微知著所測輒不爽人遽聆其言有若宿構其獨具隻眼處多出人意表但皆從事理之肯綮而明察有得不喜鑿空武斷也人或疑其持論過激迨事既驗乃知其洞垣之視有太過人者深心人早識其言以作觀事之鑑焉

公素敏於事督人處有慮其涉於操切者公則曰因循之習殆常人所難免余忝在秉軸使不有以力矯之是將同歸於委靡其如公事何余豈得已耶其言似近偏激而事實蒙其益也故曾事於公者或有他就必以幹鍊稱其職其亦出於甄陶有以養之使成耳公之以言惠人亦深哉

公之處世固以剛果勝當其一往絕不以榮辱禍福介於懷故名動羣流而謗亦或隨之公則

曰人爲得失毀譽所囿縛者決不能勝重任余生平際會多不期然而然至處世遇人惟知一秉於公但是非之心在我是非之口則在人愛惡足以亂是非余固不得杜人愛惡之心而鉗人是非口也公之言如此其襟度亦從可知矣

公素健談又疆於記憶每與知友相過從共話清尊聲振屋宇昕夕不倦縱論往事如指掌剖析事理無纖悉遺聽者如醉醇醪而公益媿媿至忘寢饋偶否臧品類評鷺是非其言無不曲中窾卻宿學或嘆弗及

公善用青年惟深慮其習於矜躁浮浪故方其授職也必先肫肫誡之曰置身銀行者自以爲席豐履厚起居服御率喜逐時競新崇虛增華或酒食徵逐無間日沈湎既久罔識自省蓋流而知返者實鮮故以侈靡惡習始者必致墮品敗德以終時言以名譽爲人第二生命行而若此其如人格何尙復有成就之望哉又曰人貴自強又貴自樹立不可隨俗翫靡青年爲身世基礎尤宜於此痛自警飭能知繩愆糾謬責在己身庶可無過矣及畀任既定猶必不時寄語負監督之責者隨時隨地加以考察不稍寬故受知於公者固多謹愿士卽狡悍之輩一入公

門終能以漸而引納正軌公啓發之言入人不亦深哉

綜公一生立身應世最服膺於忠誠勤儉諸字近年飽經憂患於其同人責望尤切爰卽所以律己者誨人孳孳弗倦特製爲一箋而頒之俾作座右銘爲時壬申春也詎期言猶在耳不逾年而公已卽世悲哉

附錄公五字箴言

憶自我行成立十有四年一切成績之足觀皆諸君精神之所積言念及此欣慰深之惟業務殷繁叢脞滋戇况今內憂外患來日大難念行基締造之艱暨諸君責任之重良有不得已於言者誼等家人情如摯友剴切以告當所樂聞

一曰勤 民生在勤古有明訓我輩雖遭時多故而履安居適所享究勝於常人自當於職分應辦之事朝夕孳孳惟虞不足更盼持躬敬事無稍被促於人庶幾對己可安對公無愧

一曰儉 儉爲美德中外所同近年風氣奢靡個人生活日高行用支出日鉅因念古人惜物之訓無間公私惟有於己於行無論毫末細微處處加以珍惜私可無慮支絀公則裨益良多

一曰忠 謀人必忠載在論語況行事之興替即關於個人之榮枯息息相通至爲密切是宜視行事如己事時時存負責愛護之心自可收共存共榮之益故利行即以利己謀己不如謀行

一曰誠 誠信所孚可通金石本行以服務社會爲主旨尤當恪遵此義力戒虛詐篤實不欺勿誇大以喜功勿行險以徼倖以期營業立於不敗之地而謀社會福利之增進

一曰謙 勞謙終吉君子之箴銀行業地位較高局面較大身置其間往往爲環境所迷易於倨傲人卽不加面責而退後有言固足影響業務尤非涉世所宜允當和藹近人以使來者之樂願

上列五端匪僅從事銀行業者所應知勉凡人立身之本在是古今立國之道亦在是於今國事危於纍卵推原就因殆由惰逸反覆詐僞驕侈之習中於人心者深耳如不揣其本徒皇皇焉奔走呼號競陳高論以爲可以救國抑又何用誠使全國民衆能各就其業本諸上之五端勉而行之則修己卽所以爲公盡職卽所以愛國無人不如此無時不如此國難何患不紓國

恥何患不雪願滔滔皆是罔識所從矯而正之卽自我行爲始歲序方新國難未已書此當面願共勉之



## 處世

公生而歧嶷性剛毅及非舉止軼羣前輩故老見者胥奇之既長益穎異風儀峻爽神采溢襟期遠曠方爲學卽抱兼善天下志迨處世接物廓然大公胸中不設城府終身無隱事其興業或服事於地方也無不竭忠智以赴未嘗有纖芥利己心存其間亦不以巨細異其操有事商於人書函往復一牘輒十數箋因公守秘者有之而語不及私也平昔處友好一維懇擊至有涉於公則畧不恃私交而偏頗其見以損公家其磊落方正固昭昭在人耳目故人亦退而無後言也

公治事富於定力入手之初首重秩序臨變更饒機智人或有不知所措者公則處之裕如但雖敏練過人亦非專於獨斷凡遇重要而可從容措理之事其得失利害之權衡必先廣集衆思參以己見迨羣議既洽然後一其心德以舉之故凡有設施莫不事半功倍人以爲難能而公則以爲常數至無論爲行爲國凡關於大計衆有所譏諉而義不可辭者則赴之如不及肩

重任怨雖蹈湯火所不顧也

公立業之宏人以爲難公則終以爲弗足恒曰以若所爲而所獲如此其僅能無歆然未嘗不咨嗟太息人第知公之事業日新月異洵由於才力之超又視其急功似乎近名實則公勇於自強而又謙以自牧存乎天性非有所勉也一生成功之樞鍵端在是或謂公果於自任殆猶未足以盡公

公之封翁曩日從政貞素自守不事干謁旣歸田益恬澹公在少年習聞庭訓即以養其志故生平循分安素積行不求聞慷慨尙節義操持堅定不爲外物所搖奪世風所左右數十年如一日其不受非分之榮不弋偷來之利誠可謂古之遺直者矣涉身銀行後持在商言商之旨視名祿尤漠如也或慫以仕則婉謝之曰致力於社會當務之急何莫非盡我天職豈必定以委贄服官始爲報國也哉吾之本懷若此非欲以淡泊鳴高也人僉服其超而偉之公一生廉隅自礪處腴不潤權子母計奇贏爲行務謀無不殫其知私則不與焉縮金融樞紐廿餘年掌握出入何止萬萬而家不加富易簣之際其清貧乃爲戚友所不及料於此知公內行純篤

非徒以才見稱其足爲世欽重更何如耶

公終身不治生產惟於北平愛其風物勝他鄉蓋少塵俗氣也更以久於其地視爲第二故里有於此終焉之想且爲免播遷計爰卜築於城之西軒廊庭院略略部署公固素崇賓禮歲時款宴必先飭廝養事灑除務修潔入其室卽如見其爲人又愛馬廠饒郊野趣得隙地置屋數椽小置花樹偶或一往憇一半日滌煩襟耳非圖逸也生平無專好獨於名賢書畫及磁石諸玩恒愛弄不能置其封翁固精於鑒賞者公於童時卽於此富有興趣但未嘗以之喪志耳

公無恒情者尙而不喜煩文縛節則尤其特性也歲己巳冬壽五十同人商令嗣以稱觴請公婉謝之固請則曰豈欲居避壽之名哉丁茲國計民生殘剝殆盡乃爲此踵事增華之舉人或無言天其罪我將何以自安愛我深者必知有所擇矣公固交游廣夙負物望時各地親知契好以禮致賀者踵接令嗣審父旨莫能違弗敢遽白而重拂人意又不可復以同人之請數四言於公不得已姑許略備盤殮以款至友戚毋鋪張凡所貽贈則概璧之令嗣唯唯故當時除懿親密友之惠無可堅卻及鐫書字款不容或辭者俱未曾登於公之堂非令嗣之執也公之

性尙朴殆不可強耳

大陸銀行爲公所手創慘澹經營其精神實息息相附託晝作夜思二十年無少間而其忠誠所格殆與神明契合可舉事証之是行總經理處先是設於北平其建築固極宏敞備有儲藏室位於樓上爲貯文具之需其下爲庖屋竈突偶失修積烟欲然人固弗可覺也歲丁卯冬一日時方拂曉忽有焰自窗中出灼樓板以焦煙彌漫一室行有警士偵知之急嘯衆謀灌救並遣人往白公使方在途公則正當熟寐突夢有人踉蹌來急呼之曰起起行有火公一躍而披衣命駕欲出初未料實有其事更弗解其所爲爲何如也足未出戶限報者已止於門公大駭疾馳車赴行時消防戒備已甚力幸未肇事其後檢計祇略損紙楮零件而已家人舉大慶慰以爲神之默佑論者謂公之精忠實感召天心乃有此先事授朕兆之奇殊屬曠聞云

## 待人

公好結納交游遍國中而衷有主宰廣而不濫和而不同凡所契合率一時學行交修之名雋其氣誼相投逾分者多訂爲兄弟交傾襟披豁久而彌篤而識無新久莫不接之以誠信重然諾有謀於公必竭知慮以答如商及國計或地方公益之舉則殫盡悃忱尤極周摯民國十七年崔公文徵執平津衛戍司令部餽糈大政適以晉鈔兌現暨籌措軍需諸事往返平津席不遑暖與公晤於北平商會一見洽平生驩結契逾尋常嗣後過從益密崔公旋長津市諸多建設公輒有所翊贊有商於公者更樂爲之助嗣以大陸銀行代理市庫一切進行相輔益力無何崔公致政值時變非常公特由平馳車赴津殷勤致問崔公感其誼之摯不去懷於公之歿慨惜不已特紀其交識顛末以志不忘

（崔公題記  
原文錄後）

悉舉

人有事卜計於公公知無不言當時人以所授証諸事實固投若鍼芥援而行之輒獲桴鼓效

蓋所見者明而所謀者誠故言無不中也有吳公昆吾者公昔在江南高等學堂之志友也相契素深公創大陸銀行既成曾致延攬意吳公方有事於國不果來然過從固無間時五年公債價之趨勢騰踊公會懲其購如干曰厚利之券吾可爲君操之已而果然吳公服其智公卽世愴喟不能釋馳箋記其事志感慕焉

原文附錄於後類此之事殆不勝述

人有求於公公必任俠相助之力所及靡不盡心有擬圖棲藉者苟非棄材則必量而安之俾得所學行俱優之士不辨親疎用各稱其志人相處或有齟齬甚至不能相容者得公疎解輒歸好如初故解挽紛難爲魯仲連者數矣知舊中落拓而甚有至於無所依者調濟之不足或舍之於家終歲贍給無虛他如扶危周急加惠於人之處益難更僕數一時海內勝流巨子論及公者無不以風義尙之多以握手一談爲快於公之歿題贊多肝膽照人之句信有以也公篤念故舊一往情深有無錫中國銀行行長葉公瀛仙者公壯年至友也今大陸銀行協理葉公扶霄北平分行經理王公鑑堂皆經濟宏碩公生平所倚爲臂助者溯其交識實葉公爲之介公居恒嘆其人鑑之明自愧弗及歲壬申瀛仙先生作古訃聞於公爲之廢牘失容曰弱

一知音矣愴惋唏噓不能釋挽以聯曰二十年相交以義相知以心爲友聲所最難得三千里無夢可尋無魂可駐愴我懷其何能堪其感舊傷亡溢於言表年來公疾作甚頻意興銷索輒動身世之感每遇知契殂逝則沮喪至減寢食其愛友之誠生死無稍間有如此

公生平遇人維誠既如上述而於及門諸生眷愛之切尤所罕見前大陸銀行總經理曹心谷先生公之高足也年方卅五齋志以歿公如傷手足爲之揮涕題照愴感無已時心谷逝後妻氏許撫遺孤鐵珊煢如也公視與家人一體凡其資財之保管生計之籌維收支之核算甚至一縑一粟之微有商於公無不謀之如已事借箸安排必使妥帖而後已壬申春鐵珊偶失血乃母思甚馳書白公公以其年正在童稚殊有肺病虞急促之就治滬上並爲函電致滬友謀醫藥籌費用務周洽一方由公之夫人寄語許氏安其心蓋許氏素多病慮其重有傷也其體貼有如此迨鐵珊疾平返邦猶諄諄致書誠養攝醫藥費數百金核付帳款略無煩瑣之厭心谷之太翁子霖先生每與公通問無不感激涕零嘗集公與心谷之字製爲楹聯曰丹心貫日月崖谷壯山河刊於居室謂志公之德永矢不諼也其於公感慕交至之誠蓋可想見

公善交故好客尙賓禮歲時讌飲車轄摩於門饌餽惟恐豐贍之不至杯酒言笑每至宵分始各盡驩而楸公尤樂而忘疲北海之風重見今日偶離索獨居卽動落月屋梁之想必命駕而圖一聚爲快蓋公之樂群天性然也

公於同人屬望殷勤期及門諸生更若家人之切學行砥礪不稍寬假尤好提掖後進量材器使信賞必罰於超卓之輩愛護惟恐不至不避親亦不以疏而有歧視於懦弱者則以言感奮之同人舉措有不愜則矯以正言故規過必使其廢然而返知所改時或臨人以厲色受之者初覺難堪久之皆翕然從服而公亦退無後言人潔己以進公則寬大容之觀其後效爲此感於公者尤不乏其人故交公者信事公者敬無或猜忒雖極驕蹇難制馭者遇公久亦莫售其技而能以漸由慕而化納於敦摯一途公之感人不亦深哉

公最惡人有因循習有委靡態曰人而無朝氣望其有成也難矣於善飾其非者疾之尤甚人有失公廉得其情必剴切曉之曰人不患有過患在曲謀弭謗也弭謗謗未必息徒增文飾譏耳



公與失意者遇苟非其人自暴棄必予以溫存而慰之曰人之遭逢有時但得立身之道無忤於心偶或蹭蹬終有駁極而復之日所謂否泰相尋天道固不爽也聞者莫不感奮

附錄崔公文徵題紀原文

民國紀元之十七年余任平津衛戍部餉事因晉鈔兌現及以津關庫券抵撥衛戍軍餉等事在平市商會與大陸銀行前總經理談丹崖先生初次晤談見其發言慷慨力持大體心甚重之旋長津市以凡百設施首重財政若不統一難言建設商諸先生允爲帮忙其時主津行者爲許漢卿先生齊少芹先生副之均本公意極力相助因以大陸銀行代理市庫其後公對於津市一切進行凡有所見必來相告持論明通多中竅要裨益於地方公益不少余卸職時值非常事變之際公由平專來慰問其愛護朋友之眞摯有如此者聊書數語用誌不忘時在中華民國二十二年十二月崔廷獻

附錄吳公昆吾題紀原文

予交丹崖在清光緒末年時兩江總督在金陵設立江南高等學堂予與之同學其間又同習

日文丹崖日文尤佳咸推爲班長嗣畢業離校彼此相睽違者幾十餘載民國十年春予自華府會議歸國過滬適與丹崖遇丹崖已經營大陸銀行辦有成效把握甚歡其後予返故都丹崖來訪勸爲所辦銀行作一臂之助當是時予以職務羈身未能擺脫遂辭謝之同在故都遂時相過從丹崖勸予購五年公債謂厚利可操左券如其言後竟獲倍蓰乃益服丹崖之卓識予之信託大陸銀行至今猶未斷絕者丹崖爲之介也不謂歲月幾何而丹崖已不復游人間世矣人琴俱渺往跡難尋聞山陽之笛而興悲過黃壚之墟而抱痛古誠有之今亦云然攬筆記此不禁唏噓久之

附錄曹心谷先生遺照題記

曹君國嘉字心谷安徽貴池縣人幼隨宦湖南長肄業於南京高等商業學校余彼時爲該校校長每以心谷孜孜勤學爲難能清宣統三年畢業余亦入都供職度支部兼任大清銀行稽核事宜意改良簿記乃招商校諸生來京襄助一切尤以得心谷贊助爲多辛亥事起余回南心谷亦赴湘充湖南明德經正各校教員民國改元變更大清銀行改組爲中國銀行余服務

總行開辦伊始頭緒紛繁因復召集舊時諸生來助心谷亦由湘來民國二年心谷調充漢口中國銀行會計主任旋調鎮江中國銀行行長余亦於是年冬出長南京中國銀行鎮江行爲甯行管轄支行數年之中屢經事變而甯中行及所屬得以無恙者得心谷之助不鮮民國七年春心谷調升山東中國銀行副行長余亦同時移任北京中行行長八年春余受各方友人出賃委托組織大陸銀行因中行事屢辭不獲即邀其來津任津總行經理之職諸事草創心谷則闡精竭慮慘淡經營乃克有此基礎翌年春余辭中行事担任大陸銀行總經理之職迨京滬濟甯各分支行相繼成立心谷參贊之功爲尤偉前途發展諸賴賢勞乃九年秋心谷遽嬰時疫一病不起時年僅卅五歲天不假年賚志以歿社會少一人材我行失一臂助其感愴余懷爲何如耶津總行新屋基址本爲心谷所擇定茲者建築落成心谷之墓木已拱憶十餘年余與心谷始終相依豈徒師弟之愛實逾骨肉之親悵往事之如烟嗟浮生之若夢撫今追昔能勿黯然爰對心谷遺像敬綴數語以誌弗諼

民國十一年十一月五日談荔孫識

## 興業

公方爲學卽以振興實業爲職志本編旣言之矣迨其學成致用於各國實業大勢無時不在究心故能洞悉靡遺當其任北京中國銀行行長時於我國國計盈虛消長之機窺察益詳鑒於各國一切事業寔明寔昌貨物日益充牣我之中土坐使利權旁落如卮漏難塞已無可諱是各國之以經濟侵略於我者實駸駸乎與時俱進而實業之盛衰關係國家經濟之榮苦更從可審識故公之意欲謀振興實業非先溝通金融實業兩界使其脈絡相貫不爲功又非從事於經濟建設之新途徑中自樹一幟不足以發紓素蘊爰於八年春集合同志萬璧宸王清泉蘇勳臣李贊侯張公權吳震修賈賓臣成蘭圃張燮元許漢卿諸公暨門人曹子心谷籌創銀行曰大陸諸同志固皆與公契洽無間衆擎一舉行基已奠於指顧間矣惟新模初啓萬端輻輳公總持綱領衝繁扼要心力俱瘁爰成立總行於天津公時以中國銀行任重當局且維繫甚堅不可遽辭因令曹子心谷暫領總經理之職心谷學識行詣悉冠同曹爲公所最賞拔

者既就任公爲之綜理一切心谷則步趨相隨已而中國銀行職責移寄有人公始向當局婉陳其意當局勉許之實則怏然於時北京上海漢口南京濟南各分支行已次第成立方欣大業蔚起不意心谷中道殂謝公哭之慟由是內外巨細萃於一肩肆應之疲且日甚矣然畧不以勞而苟忽大之國內外經濟形勢小而一隅之市況商情沈觀洞察博訪周咨必瞭然其底蘊而後止至業務之進行靜則反覆研求動則當機立斷而關於用人立法則體驗尤深其於事也一切規畫皆務從遠大導各邦新法之適合於我國者而融會變通以推行之其於人也則抱定非工不食之義必甄取幹濟之才量而後任善善從長其於額支也則考覈精確雖微非當不用故一行以內事無曠政人無廢職費無濫支同人或見他行有以得時而駕者慕之殷以可法請焉公則曰養根竢實何患無英華發露之日慎毋銳進脫徒攬開發實業之美名以圖倖成苟就其顛躓也恐不旋踵吾甚無所取是以公於行基奠定後事事腳踏實地不汲汲於近功不沾沾於末利未幾績已斐然再越歲收穫益倍蓰其後青島蘇州無錫杭州各分支行又先後成立並於各分行所在地設有貨棧一或數所爲副業之進展津平滬漢四行且

各轄有數辦事處嗣又劃分儲蓄部獨立經營復立信託部於上海並附建大陸商場凡所措  
施無一非適應環境切要之圖其規模日以恢弘贏獲遂益以年遞進亦云盛矣而公則深以  
持盈保泰之不易遇事益矢競競轉若有所弗勝故業務雖在發揚騰蹕有一日千里之勢而  
行譽則始終以穩健聞也今之總理大陸銀行者爲許公漢卿亦最初籌創人之一公生平倚  
任最殷故繼公而膺此大任年來一切進行固無不以蕭規爲隨厲經營於穩健之中年來於  
北平增設西城辦事處長沙增設支行近復於石家莊籌立分枝皆公有志而未逮者也大業  
蒸蒸之勢正方興未艾公泉壤有知亦可慰藉

公好羣有天性一時名公碩彥亦胥樂與相成故於其創業莫不羣策羣力竭誠匡舉計自大  
陸銀行開辦迄今如萬璧宸張調辰李桂山成蘭圃龔仙舟婁翔青婁魯青馮幼偉馮叔安吳  
蔚如李贊侯張公權吳震修賈賓臣賈頌平錢新之蘇劭臣顏駿人齊翰卿王笑雲許漢卿俞  
仲韓沈季宣諸公咸先後更迭被推爲董事或監察人諸公固皆經濟宏流凡於行務擘畫率  
與公所見相同他如及門諸生以及公之親知故舊凡可用材亦多茅茹連拔各秉精誠全行

既沈瀝一氣故大業易臻郅治之隆得人之盛夫豈偶然哉

公於事業固以社會國家爲觀念初不以公私分其畛域鑒於世界經濟潮流起伏倏忽而我國金融政策又尙未盡納於正軌商業銀行非厚其勢力不足以收合作互助之實効因於十一年夏與鹽業金城中南三行訂立條約聯合營業締造之基至此益宏四行準備庫四行儲蓄會皆其合作業經營未幾聲勢日見磅礴其爲社會民生所利賴已昭昭在人耳目矣其他三行之總經理爲吳公達詮周公作民胡公筆江也皆一時經濟宏碩凡關於國家或地方財政大計政府有所商於四行者四行莫不推誠相與同籌共濟已成屹然四柱與國家銀行並峙而其相輔相成之處正非淺鮮允爲我國經濟史中之一異采也

大陸銀行津平滬漢行屋初皆出於租賃旋以幹局日臻宏闊乃先後自謀建築以規久遠如天津之法租界北平之西交民巷漢口之法租界上海之九江路等處其土木經營俱費達五十萬或七十萬金以上當其鳩工庀材若繪圖也固皆出於名工程師之手然公未嘗以有專人負責而遂悉以委之相圖覈費百計營度幾與工師擬其勞工之歲或綦年或兩度歲公之

用心則與相終始既落成輪奐之盛皆爲時所推重北平上海兩行則尤足稱至保管庫設備之精嚴更爲國中有數者也人第知工師規畫之細初未悉公於此匠心獨造搖精斂神之處殆不可計其幾許矣

二十年夏武漢大潦災情之劇百年未有漢行經理俞公仲韓公之兄弟交也忠正勤謹與公無少間遽逢此厄籌維策應焦勞至廢寢饋一日鄰牆驟傾圮水激至勢汹涌莫能當俄頃行庫行將進水俞公急躬率同人暨厮役一致搶護如臨大敵一霎間所存品件悉移置樓上一面督工洩水力謀安全防堵計卒賴以無恙使其時赴機稍後變詎可測故當險急之際俞公幾欲以身殉致公函曾備述公爲之擊節嘆服報書慰勞備至他如貨棧堆存貨物達數百萬之多俞公均早先事部署安妥綜計災患經過閱數月之久俞公往返商榷應付函電紛馳不絕於道公雖在深宵熟寐得電必立起擬復而憂痲所積爲之形悴迨安瀾既慶統查漢地之罹於此厄而遭損失者無慮千萬獨大陸銀行及其貨棧卒以俞公忠勇應變略無錙銖之失不僅本行歷史上足以流光於永而行之精神益以此褭於時故聲譽因之激進至今社會人



士論及之莫不以重公者重俞公且愈嘆公之治理得人也公一生精誠感格凡公事之得邀默佑於險難之際類乎此者不一而足殆亦可謂異數矣

比年國中蓄害迭見一二八淞滬禍作繼以三省甌脫內亂外侮相尋日亟公徒被纓志切感憤激昂居恒有唾壺擊缺之概而當此國勢震撼憂患相煎之際行務進展之費力益非海宇承平時可擬公之履艱辛歷盤錯愈不可勝紀然堅忍刻厲忘身挺任固夷險一節也且勤苦耐勞爲公一生治事就業之最得力處以百務填委之身雖至手足胼胝亦未嘗或渝素旨於一切事達機通變破觚爲圓略無顧望避就之習卒能通扞格越險阻故行事之進程雖遲不餒以歲計其收益固仍綽如也

## 理財

公就傳讀書卽慨然有經世志時科舉未廢公殊不沾沾於帖括蓋深以爲由文字博功名不足有裨於國計也封翁固有意於經濟匡時者且默察國勢積弱日甚挽之之策當以利用厚生爲急務子弟自宜從事於實業專門之學俾可出爲世用乃決令公就學南京南洋高等學堂公一生長於理財固早可於其襟抱占而知之而其封翁識時致訓實有以成其遠大至其造就之基則已肇於此矣公既承父志究心實學益審知欲謀強國必先富國富強之圖則必以開發實業始而我國金融之紊無條理實又爲富強之障礙復鑒於東西各國庶政咸熙多足取法因毅然作游學他邦計旋以優材生攷送日本東京高等商業學校肄業於彼邦實業之隆替財政之得失博考覃思兀兀窮年旣卒業就日本銀行實習於經濟微蘊更多所窺獲未幾歸國應學部試列優等獎給商科舉人嗣卽歷掌教職發紓所學於國家財政關心彌切歲辛亥春補應廷試以主事籤分度支部時值清室末造外國多以經濟侵畧於我我之財政

權駸駸乎爲所陵駕秉國者怒然憂之因自創銀行曰大清着力於財政上整舊植新之策一方留心甄用俊乂公卽奉部令調派是行稽核既受職固殫竭精力於冊籍之鈎稽其他亦多有建樹是爲公參預國家計政之始當道之重公亦起於此也辛亥鼎革拜南京臨時政府財政部之令筦理軍用鈔票事宜時軍戎旁午財政茫無端緒軍票章制又在初頒前無所因流通未廣其措施之不易殆難言喻公昕夕籌計凡有上章無不報可於是功緒大展鈔值遽騰踊軍民咸翕然稱便當道以其舉重若輕因應得宜嘆爲綜理長才尋南北統一大清銀行改組中國銀行公調任計算局局長基礎初定事緒縱橫公則整暇規定章程改良簿記一皆出於新裁而無不適合於事轍並設簿記講習所以儲材備用會計規模於以確立今日各銀行沿用之新式帳籍殆於此開其權輿其用心深密罕可倫比是時當局深以金融之仍未納於正軌也特設國庫局以策統馭惟事方創始又承度支紊亂之餘百端待治僉謂以公屬之當可勝此繁劇遂畀以國庫局局長公既縮其樞對於帑藏之釐劃規程之裁定莫不採東西各邦法制之脗合於我國國情者斟酌損益執兩用中窮數月之精力其績乃顯國庫制度既經

創行復以賦稅法行之已久民多生玩而國家則惟培克是務上下不免時有扞格虞公乃甄擇時策折衷己意爬梳排比草條例若干則綱舉目張粲然明備要皆剔弊興利之圖循而行之整飭之功大襮公理財之蘊抱於以益展自是當道倚畀亦愈殷矣三年調充南京中國銀行行長行爲創局公手草一切章則發縱指示所措靡不當鎮常各地分支行旋依序成立咸爲所轄維時蘇省屢經事故金融混亂殆造其極又當政府擬採用金庫制度以謀收回地方財政之際成規頓改軍政當軸見殊不一公畢其智力赴機迅速周旋應付無忤無阿卒能理紛錯而歸於一蘇皖以次告其成功然是時政局迭有變遷四方蹙蹙靡騁司金融之挹注者輒當衝公以無方之知曲謀肆應諾無所傷謝無所迕愈爲各方所推重五年政府因應時勢有中交兩行鈔票停止兌現之令電傳至甯人心騰沸不可終日公以此事爲國家大信攸關而於商業民生尤有切膚痛癢期以爲不可維時長南京政務廳者爲俞公仲韓公託交最深因與熟商曰甯負違令之咎殃民殊不可也乃力主照常承兌並與金融界時賢合陳利害於當道幾近廷爭之概卒韙其言各處更踵效之故停兌止於北京一隅經濟幹局賴以乂安

隱受其惠者實非淺鮮公一生應事膽識之獨到處多類此七年調充北京中國銀行行長蓋當局以中國銀行規模日宏於時北京又爲政府所在地行務繁賾非京外各行可擬公固最初創辦之人匪獨易收輕熟之效並以備總管理處不時之諮詢焉於是一切大計公悉與其謀而多翊贊有所屬尤挺身任之不僅於京行一部指揮若定也綜公自任大清銀行稽核迄於北京中國銀行行長爲時僅七年耳而其理財之績已翕赫一時使再假以歲月其勛勤昭著更何如哉

## 教 育

公之封翁亞蘧先生致政歸無志復出獨拳拳於作人之計以處於五洲大同之世我國乃罕通時變坐使百政隳弛衰貧寢其振興之圖自在得人而才難之嘆又於斯爲極學者自不宜安常習故以自封必作而新之方足以應時用然非先溝通中外使無扞格不爲功公兄弟行聞此訓者諗矣公之從兄勤生先生固才力超雋秉承其旨先試創東文學舍於淮安作輸進文明之先導公則襄輔籌備既成立首先入校爲諸生倡其時鄉曲父老多以驚趨新學相詬病而公昆弟則苦心孤詣不爲所撓卒使學子莘莘接踵至風氣爲之不變焉公一生注重育才蓋實秉夫庭訓而童年觀感已識其倪諗知當世急務端在是也迨東渡扶桑留學數載篝燈密室固極孜勤而於彼邦人才得失與國運盛衰之關鍵所在無不洞然在胸歸國未幾會端忠敏公開府兩江改進學務延攬宏流異君才聘爲江南高中兩等商業學堂教務長兼任教授公乃本樹人夙志嚴定課程抒其所學詔示後生要皆經國之計公尤善講解詞明暢能

達幽竊之義循循啓迪未嘗有倦容使聽者豁然無疑問且以時勢推遷天演爭競學者非可  
暖暖姝姝私悅一先生之說即足以應萬需矧學貴適時用期實踐乃於校內特設銀行實踐  
室以宏造就凡所制定莫不於舊習有所繙改而刷新之蓋意在切於實用非欲標其異也一  
時銳意攻學之士無不備受甄陶咸感於公之教誨若是其誠莫不淬厲奮發爭自琢磨學績  
爲當時諸校冠師道立則人才蔚起所關固非細故今之蜚聲於經濟實業界者多當日從游  
士也論者以其冶鑄士林深有裨於國計或方之於胡安定云

公於培育專門人才固不遺餘力而於公衆教育則提倡尤勇國立東南大學一軌範恢弘之  
學校也曩以籌設圖書館曾於各方謀集資時公已握金融鈐轄爲作登高之呼無何卽獲有  
鉅數是館賴以觀成旋復分設上海商科聘公爲委員益得其贊助力是校園圖書館長郭公秉  
文以嘉惠後學雅重公交彌篤公卽世特紀其始末以志感悼類此之事不一而足他如各中  
學大學慕公風義爭相聘爲董事若委員者尤指不勝屈蓋多藉以提倡或有籌資之相須耳  
已詳年譜中茲不備載

公於樹人大計謀之詳盡既如上述迨創業已成尤渴於才求如弗及於所用人栽培之中仍不忘其訓導凡才智者固多優加獎借俾展厥長而於樸鈍之輩益諄諄善誘必使有所成就而後已故後進之蒙提挈者不知凡幾一時英雋青年不獲從游或未得事於公者靡然向風輒以一謁音範爲快其雨化動人爲後生所崇仰有如此

公於青年無不以深造期之其長於教育體驗力行固人所罕逮而其責望於後生者則殷殷以力學爲唯一之勸蓋公實以躬作則也當其少壯孳勉攻苦卓有異人之處卽已成業猶不忘此志嘗題其齋曰不如學並倩陳公弢庵書而額之以誌惕厲兼勗子弟斯知公一生敷教有方洵從好學中來豈易言者哉



## 慈善

公於睦嫻任卹固以爲孝友之餘事也凡以窶乏告義所當與者雖無羨財必竭誠濟之不稍  
靳卽或瀕於拮据亦委曲以應孤寡之輩喪葬婚嫁教育諸費不能自舉有謀於公必量加協  
助而無德色有常年賴公之資飲者準時寄款以爲恆更未嘗有倦容邇年每值歲莫各方親  
友告急牘幾盈尺公乃虞泛應之難曰安得盡如人意但求無愧我心故調恤之數積年計之  
殊不貲惟不爲姑息之惠設有非禮相干則公銖黍必審或竟婉卻之非故愼所與實不欲傷  
其人之廉耳識者躉之公於慈善施與之事什一之概如此至地方公益則或慨予推解或力  
爲提倡更無不盡其心也如事關育才則益樂於輸將其最著者厥爲創設淮安江北慈幼院  
淮安曲處大江之北文明之輸入較晚教育風氣本與境外澀齋然多間閔而養蒙設施尤闕  
如也歲癸亥（十二年）以還淮泗間旱潦饑饉災荐臻孤藐失倚寄者觸目是謀懷撫之事  
體大地方力敝無能舉公惄然憂之深因集江淮朱公虞生周公作民陳公羸生諸君子籌教

養得所之策競倡於各方以鳩資啟其基淮之紳彥田魯嶼郝彥樵王慕莊王澤民徐紹泉諸公亦亟起贊助募與輸俱力公爲之尤勇款集有數定爲創辦江北慈幼院基金諸君子董其事公則推爲長焉籌議确定旋聘宿遷李君翼唐任籌備委員李君爲公及門北京大學畢業績學深思士也於教育尤具熱腸公先以調查北平香山慈幼院北平貧兒院龍泉孤兒院暨蘇屬滬甯鎮揚清准寶應各地之孤貧幼稚教養各狀況任務屬之翼唐馳驅歷時一一復命瞭如指掌無何成立籌備處於淮安之四公祠翌年以事漸繁謀拓其宇屬意於漕察兩院遺址蓋以其敞罔勝適於用也詎址爲某軍所駐商再四不可僉以置舊屋重新葺構充院舍以策永逸爲善因朱公虞生之介於淮城之東嶽廟市口卜民宅一所歷三月成議屋主狃陋習踟躕讓其居公懷赤心切時以曠日深喟歎然末如之何屋甚敝脩繕費巨諸君子謀益亟公則籌之愈不遑且事方濫觴經畫章制事殊難公掣其領與諸君子商討既熟即以李君任院長俾專責成策進行十五年夏籌備訖招生趨試者如趨父母錄八十人九秋之望行始業禮淮地羣流及院生族屬止而參觀者達千餘盛況爲時所稱道各講席胥小學教育專家一時

之選養極其恩教極其嚴立法之盡美善實冠冕全淮輿論尤偉之未幾績斐然聲益著原意  
做北平香山慈幼院規模由小學起輒而中學而大學並有選優派遣出洋留學之擬議惜院  
之基金悉恃輸募公等私囊源源之濟既苦不易又值政潮迭起時事孔艱廣募之難倍甚教  
務因時見襟肘僅得於每屆小學畢業生中選拔一二雋秀升送中學肄業現計畢業於淮安  
中學初中部者五人蘇州工業染織科者一人其中已有兩生升入淮陰中學高中師範部餘  
均各就相當職業以貧窶之子得由小學而受中等教育公等仁惠所施不亦猗與徒以經費  
侷促莫能展布諸公困心衡慮不得不作改弦更張計未果會李君應淮陰中學校之徵而去  
職改聘何君楚侯繼之特院務進行益踳躓是役也諸君子幼幼及人之精誠固人所罕逮而  
其事之審畫煩細穿柱苦辛尤爲人所弗能堪特公於淮安視若第二故鄉故爲敬恭桑梓之  
心所驅使而不能自己然心力之憊於此者不知其幾何矣卒以艱難致頓挫使義舉就於萎  
縮瀕似瓊尾流離豈得已哉但其垂統固不可泯自有關心志乘者甄而闡諸世公與朱郝徐  
三君先后作古人身世滄桑之慨又曷可已近聞周公作民陳公羸生及淮安諸君子復有改

組此院爲職業中學之意公若健在其舉擊助啟新模勞悴更當何似嗚呼而今已矣

## 總述

公體素豐盛神明聰強精力彌滿惡逸喜勞數十年不易其致經世以來宣勤於教育實業兩途雖有司克盡厥職而事無洪纖仍必躬先籌計在在從真情至理處求實踐尙貫澈屏矯飾以爲倡率人不堪其疲公則不言憊曰此余半生之所貫習矣以體質本疆故生平寡疾少而學壯而游以蘇吳之卑濕而燕冀之風燥常人當之每不安公則鮮以不適聞也卽偶嬰小極亦不介意近年時艱蒿目益以操作日劬人事摟於外焦思灼於內質非金石幾何不病居恒鬱鬱寡驩笑常語家人示頽唐家人爲之庭中小置花鳥冀其偶值公退藉以摩娑公或顧而樂之然終不解其悒塞曰天之方蹶無然泄泄吾今生逢憂患豈耽恬逸之時古人恒藉酒以澆塊壘余將不得已而聊復效之乎公之襟抱於此可見年來疾作益頻猶復勉力撐拄夙夜在公非至萬不能支未嘗乞一日假親友知舊無不亟以葆救勸公則曰旣已致身社會自當死生以之鞠躬盡瘁古賢往矣吾亦請事斯語與同人書亦多以此爲言詎期公之志未竟公

之言不幸而中丁茲國運萎此哲人天心豈可卜哉胡適之先生感公之歿題贊有鞠躬盡瘁之句蓋道其實也綜公一生志趣堅定行詣卓越其數功於財政教育各界培才足用固與國計民生息息相關他如內政外交法律慈善諸端於治事之餘亦靡不悉心研究洎夫大陸銀行成立則益抱地方實業公諸地方人士之血誠所有一切經畫無非爲社會公衆盡其誼任艱馭遠尤極賢勞而其措置周洽實有不期而與世界經濟新猷相膺合者豈僅足以一時儀刑四方允可資爲來者止水之鑑矣宜其各學校之謀觀化者每一臨止見其行之精神峻整莫不嘆爲國中有數之軌範海內之以譽公者譽行容有溢美之處然功業昭彰舉世共仰其景慕之誠已可概見使以公之才器再假以天年其福國利民又寧止一大陸銀行而已哉烏乎而今已矣公逝後其同人抱無涯之戚謹於各行成立紀念堂春秋薦享以昭報功竊以處此五洲商戰之世國家命脈繫乎金融其消長盈虛與夫人才得失宜留爲異日之攷證同人等固不敢私其所尊侈陳故實弟公畢生言行之足述者歲月寔久或等於文獻無徵同人既幸接德風薄有聞見爰不揣踰陋謹就所知者綴其匡畧表而出之敬告當世卽以備掌邦國

之志者之甄采其不知者異時史乘或有所詳茲不敢以虛誣而蹈述德浮稱之愆也

哀詞

靈脩醇粹

徐世昌

哲人其萎

朱慶瀾

卓識雄才

王震

德高望重

中國通商銀行



哲人其萎

中匯銀行  
傅品圭  
陳國華

古道可風

安裕  
記源

哲人其萎

竺梅先

儀型百世

金培生

哲人其萎

胡來同

典型常存

愚姪沈浩

哲人其萎

傅宗耀

果證菩提

王曉籟

惠霑化雨

天津中國大陸商業總公司全體同人

惠及工友

天津北平中國大陸商業公司工役

義方啓廸

德隆望重

人亡國瘁

中國大陸商業公司  
北平青島全體同人

徐興林

唐乃康

## 哀詞

丹崖姓談氏諱荔孫家於淮南生而抱濟世之志知國之強弱財政爲基乃負笈東瀛肄業於商業學校學既成卽服務於日本銀行歸國應學部試給商科舉人廷試籤分度支部主事調大清銀行稽核所得敷布所長旋充計算局局長國庫局局長民國三年充南京中國銀行行長上與武夫悍將相周旋下與地方紳民相調濟理紛定亂籌措裕如七年調北京中國銀行行長丹崖以爲振興實業助展社會經濟俾金融界與工商界相溝通然後工商能發達興起僅國家銀行仍不便也乃復創設大陸銀行與鹽業金城中南三銀行聯絡通流並駕齊軌社會信賴工商漑霑東西名流尋聲納交譽望馳聞交傾互慕始余與丹崖不相識也其去中國銀行也余實繼之後先交替遂相往來聲臭旣同日益親暱晨昏有暇余輒詣丹崖啜茗坐談丹崖之於余亦如之不知余之景慕丹崖也丹崖之傾佩余也有事則互贊無事則相思十五年如一日也嗚呼丹崖今其死矣丹崖年方五十餘耳體又素健溘逝之期宜若甚遠而竟中

道殂謝一瞑不顧然揆致病之因大半憂其事業爲環境所困不能盡如所計畫使丹崖而能蟬蛻或可勿病即病而仍可癒也嗚呼孰爲爲之孰令致之而使丹崖竟忽焉以歿哉此則至堪痛惜者也丹崖之卒李丹蓀太史旣爲誌其墓其生平大節論之詳矣余則念吾二人之私而有餘痛故作爲哀辭以抒余悲以傳之久遠並以遺其妻子以解其悲其辭曰

幼而聰慧兮壯離其鄉負笈遠遊兮東瀛是行所學爲何兮阜財經商三年業畢兮歸國西航置身闖闖兮器宇觥觥雲蒸霞蔚兮手創銀行錢幣通流兮沾溉工商譽望蜚騰兮氣度珪璋邂逅一晤兮爾我謂臧晨昏過往兮入室升堂三日不見兮心輒悵悵微物致疾兮夙夜徬徨羌弗能釋兮儼爾在牀哲人其萎兮殊非所望茲實有命兮豈藥石之不良溯遠因而悔恨兮殊勿用其悲傷嗟壽命之不齊兮乃人道之常矧修名之旣立兮孰爲彭殤人生世貴有益兮鮮得肆其所長君懷奇而抱異兮盡施展而願償事旣畢而雲遊兮遂長逝而遐翔因何故而  
不瞑兮氣磊落其何嘗嗚呼余之與君如磁引鍼如珀拾介潛通默感膠漆難破自我失君渺無倡和我規爾親哭泣無過豈知我悲悠悠不懈朔風撼撼嚴寒日夜君去未幾寒暑代謝撫

今追昔如聆咳唾靈如有知悉我無奈

愚弟常耀奎拜撰

熱心公益扶助自治偉哉先生其誰不思

第四自治區小學校長王書年

粹於學勤於事具經濟才樹金融業爲有心人亦實行家

教弟方椒伯

懿歟談公命世之英偉岸風度磊落性情才長經濟譽滿寰瀛忽焉殂謝嗟悼同聲永仰遺範  
涕淚盈盈

鄉愚弟

張學淵  
孫光熙

去春楊君以便函一頁云爲

談公囑索余書者余與公固無一面之雅重以老友楊君之分爲書心經歸之公爲之歎賞不  
已會公在病中云少間當與余結文字緣也今春楊君以 公之赴音告不意竟作古矣古人

有未識面而神交者其斯之謂歟爰題數語以誌追悼云

晉熙李作賓記

## 輓詩

吁嗟天道太無常，倏然日月隱光芒。  
雨何其暴風何在，霹靂一聲摧棟樑。  
實業名世人，其亡慘淒空氣彌。  
市場衆商聞耗駭，且惶呼失先河涕。  
滂萬千廣廈頓荒涼，孤寒失蔭益悽愴。  
公家寶樹紛琳琅，箕裘紹業業彌昌。  
公門桃李鬱芬芳，三千七十舉心喪。  
論公才氣若天驥，論公器度若汪洋。  
應世接物濟柔剛，事無鉅細愼思量。  
心血耗盡爲公忙，不營私產鮮蓋藏。  
友尙道義古風長，蔚爲人望歸帝鄉。  
君不見三十年前同學江南暨，扶桑於今思之淚盈眶。  
謹具荔丹與蕉黃，臨風布奠一傾觴。

如小兄馬家麟

髻齡穎異長知名，卓犖才華海內欽。  
廿載艱難閱緒業，一生兢守在忠誠。  
耆年方喜常同鶴，滄海如何遽跨鯨。  
幸有賢郎能繼志，佇看萬里奮雲程。

徐 桴敬輓



聲華貨殖夏儒林富教爲懷世共欽彤玉追隨肯辟岷紫標綜理每推心千秋事業存惇史萬國名流義盍簪旂鶴相迎胡太急歛歛碧海絕青琴

後學顧寶善敬輓

憶昔日負笈至東洋歸國育才興大陸家藏萬卷子孫昌繼任有賢郎  
聞噩耗座客悉悲傷不得免焉生死苦鉢池常在運流長千古姓名芳

世晚  
徐白吾  
劉辛

# 祭文

維

中華民國二十有二年歲次癸酉夏曆十月戊子朔越十有七日甲辰如弟許福昞愚弟葉薰謹代表大陸銀行全體同人敬以清酌庶羞之奠致祭於

談公丹崖先生之靈曰烏虛荒草嚴霜正陶靖節寄賢達山阿之慨青楓黑塞更杜工部繫故人魂夢之悲况我

談公音容濫謝時序頻移同人等或誼附載舟或分居聞鐸能不益深儀範久湮之慟倍切步趨失據之憂哉烏乎我

公天民先覺華國精英濟時富劉管之謀垂芬不朽立業臻金湯之固積厚流光自己功洽金融輝留竹冊惟時艱方亟端期賢達扶持乃哲人云亡竟慨邦家殄瘁此又海內羣流同聲嗚咽豈止同人等所深用愴感已也烏乎我

公固靈爽猶生典型宛在福嗣等遺徽矜式餘緒勉承光大前驥同負有責是無不靖共乃位時深儆戒於冰淵卽日藉慰

精明或亦含笑於泉壤烏乎我

公九原可作其亦有領於斯文而感合精誠無間生存之日也耶烏乎已矣不亦悲哉今值幽宮在奠忍聽悲歌於淮水之湄行見祭社常存永縣祀享於錫山之麓爰當卜兆之日虔脩申齋之忱爲之辭曰嗟陵遷而谷賈兮國步方荆棘胡昊天之不恤兮竟萎夫英哲痛音塵之歇絕兮芒芴乎十月將形神之安仰兮緬想乎遺烈千秋永式蔥鬱佳城以享以祀來格來歆烏乎尙

饗  
惟

中華民國二十二年二月二十五日 丹崖談公歿于燕邸粵三月十二日奉靈綽而南將瘞于淮陰降輿于江浦南京中國銀行經理吳榮鬯暨全體同人凡有友好僚舊之誼聞

公之喪莫不雨泣交頸延首嘆息敬具清酌爲奠曰嗚呼哀哉死生契闊游顧移年誰謂不痛有淚徹泉公之世德滋裔于錫能繼洪業克揮茂績精閑博洽掌教南商時雨之化示爲周行溯我寧基民三始奠厥惟開山蔚興羣彥朔地金融實執牛耳操計十葑賈壽于市何圖二豎歎我矩刑空嗟中葍莫弔孤零薄日慘黯寒風悽急靈旂不駐逝矣曷及嗚呼哀哉尙

饗

維中華民國二十二年三月十二日南京市銀行業同人李嘉隆吳榮粵江祖岱陳超衡傅麟李相村呂蒼巖羅訥齋蕭文熙顧伯言何縱炎賀荇舫夏少逸丁問樵王仲衡楊蔭溥董占春蔣望平陳介葛震卿李祖基鄭桂裳張叔淳周寶華謹具清酌香楮之儀致祭于

大陸銀行總經理

談公丹崖之靈前日嗚呼我公萬流所宗秉賦獨厚氣象豪雄乃以微疾遽遭閔凶凡在同業涕淚沾胸溯公幼年名重桑梓孝友彰聞明德是輔公爲校長始於金陵創辦商業造育羣英公爲行長夙夜在公商民被澤有口皆同公之救國調劑金融管子再世劉晏復生公之處世

恢廓大度公之待人意摯情篤公來津沽蜚聲大陸經之營之有盈無絀德應載福善以永年  
天不憖遺竟不棄捐憶公之生音容如在悼公之死徒留遺愛謹備不腆微忱是將在天之靈  
伏維

尙饗

維

中華民國廿有二年三月十二日程錫庚方棟胡牧任先煥程衡朱大年陳潛浦傅樑蘇紹濂  
葉祥灃徐毓寵常汝頤滕家謨劉孝祥周康斌吳承俊張家照戴傳泰等謹以庶羞清酌致祭  
于

總經理談公丹崖先生之靈曰錫山嶽嶽篤生奇英稟質瑰璋豪氣縱橫長風萬里破空而行  
求新知識涉足東瀛學成歸國朝野知名維時高校勗始南京禮羅羣彥鳥鳴嚶嚶教務是長  
分科並營爲經濟學大放光明方越六稔騰實蜚聲微

公陶冶曷觀厥成世變滄桑民國肇立舍舊謀新新途另闢商業重心繫在實力惟有金融與

時消息衆望攸歸爭虛前席大陸奠基譽馳南北手握中樞權衡劃一勃勃蓬蓬尤彰成績胡  
驚俶擾寇來自東遼疆淪沒洛鐘應銅國難日亟影響靡窮怒焉如擣憂心忡忡昊天不弔乃  
遘鞠凶旅櫛南歸電傳京國吾界同人驟失巨擘誼屬同舟黯然無色幾輩生徒尤深悽惻長  
夜漫漫悲風瑟瑟白馬素車設奠道側恍若生平人天永隔江水滔滔有懷莫白敬荐醪羞靈  
其來格嗚呼尙

饗

中華民國廿有二年三月十二日前南京高中兩等商業學校愚弟胡元倓柳詒徵錢永銘宗  
嘉穆任祖棻蔡廷琦陳福咸趙連璧濮祈濮祚受業湯鉅汪之槐傅麟章叔淳鄭忠鉅張毓駿  
李鴻德李敬思童楚江何軼民華萃其于爾晉金松茅以昇胡星北嚴祖述唐世注王鼎臣經  
綸劉廷煥方棟等謹以庶羞清酌致祭于

丹崖談先生之靈曰嗚呼山川變色星月韜光燕雲萬里春華不芳繫維

先生天才挺異幼讀楹書蔚爲國器乘風破浪濯足扶桑學成問世挈領提綱商校得人新知

庸啓學子莘莘究心經濟經義治事湖州之遺楷模多士久擁鼻比東海塵飛世風改革棄學而商計然決策權衡一手金心決中蜚聲大陸五達四通緬述生平大氣磅礴如何哲人遽嗟萎落國丁多難未免殷憂新亭感慨誰復神州用是鬱紆金石難保謝傳雖年催歸何早茲逢旅櫬電告南回同學儔侶心折骨摧清酒一樽生芻一束設奠江干同聲一哭嗚呼尙

饗

翳維我師淮南之英微子之後莫之與京天性仁孝無間父兄感茲新學負笈東瀛蔚爲國器日有令名司鐸南洋造就恢宏分曹計部南北縱橫釐訂國庫粲然備呈溝通商業拓殖益闕締造大陸慘淡經營荆大銀行經濟聯盟上紓國計下裕民生名馳中外譽滿公卿有子繼志克振家聲有孫步武玉樹雙清胡天不弔梁木忽傾嗟予小子親受裁成興悲歧路空悼斯情同人浩嘆失此權衡况承親炙感逾生平載瞻遺像高山景行長慟斯威奠此漿瓊嗚呼哲人其萎兮吾將安放泰山其頽兮吾將安仰河山悵望兮吾將安往魂魄歸來兮來格來

饗

時維中華民國二十二年五月十四日

受業楊祖蔭

維

中華民國二十有二年十二月四日爲

丹崖夫子大人奉安之期江南高中兩等商業學校全體學生謹以清酌庶羞敬申致祭之誠  
曰嗚呼茫茫宇宙芸芸往來死而不朽名聞如雷孕育靈秀淮泗流域生而爲英宏總一切猗  
歟我師器識兼全久膺人望早着先鞭生平出處見聞周悉瑩瑩大端足可稱述學以致用負  
笈扶桑開發實業獨具眼光歸任教授注重實踐造就既宏青錢萬選安定隆軌再見於今菁  
莪械樸皆所裁成參魯柴愚同被教化廁列門墻自鄙以下公才公望先覺先知紀綱整飭計  
政導師內察國情外採歐制經緯萬端粲然大備建國八祀創樹宏基經營締造公而忘私成  
績所垂十四寒暑展拓規模獨任艱鉅況在今茲國難當前橫流砥柱宜假以年天不憖遺奪  
我明哲木壞山頽歎歎築室光陰奄忽自春徂冬牛眠卜吉奠茲幽宮鬱鬱松楸悠悠窀穸謹



薦馨香神兮來格尙

饗

## 誄辭

猗歟先生崧岳降靈秉性忠毅孝友慈仁齠齡嗜學負笈東瀛畢業回國商界蜚聲擴充經濟便利軍民改良簿記會集羣英贊助當道振理亂棼外採歐制內察國情提綱挈目條例分明殫精竭慮舉重若輕溝通銀業合力經營大陸中南鹽業金城聯絡一氣聲勢遠聞歐美稱羨延致爲榮積財能散戚黨沾恩何期疾作遽爾騎鯨我有拙見祈奏天廷現今世界百貨充盈工藝進步無美弗臻電綫網密輪軌縱橫通商互市共享昇平如何肇釁時聞鼓鼙恃強肆毒妄翼吞併公理不張神道無靈夢夢板板哀此小民環球萬國宜有主盟解紛排難強者必懲各守疆界共保安寧製槍造彈費億萬金移作開墾教養經營財用充足萬國和親飛機迅速風急不行砲火雖惡不及雷霆殛惡誅暴天秉權衡賞罰不謬鴟獍改行人生宇內上壽百齡大廈千間八尺安身昧期適口何用八珍能喻此理儘可消兵天監在上涇渭宜分扶持正理付物平均星雲垂象麟鳳呈能誕生聖哲道大德純恭儉愛民堯舜爲心百廢具舉萬類咸寧

帝力悉忌六合同春先生此去前席直陳早平國難旋轉乾坤

愚弟劉子元

談丹崖先生籍隸江蘇無錫寄居淮安少游學海外卒業東京高等商業學校歸國試優等任  
教育旋爲計算國庫等局局長中國銀行行長創辦大陸銀行並與鹽業金城中南三銀行聯  
合營業於民國二十二年二月二十五日疾卒北平寓邸春秋五十有四嗚呼哀哉乃爲誄曰  
龍馬躑騰源泉耗竭寇氛外侵赤焰內烈神州禹域晷然四裂羣工失次百隧廢歇但恃人存  
復興未絕 公忽奄謝喪國之傑自昔救國不外富強積弱招侮疇弗夷傷 公審斯疾浮海  
求方賜不受命毅然業商學成歸國玉尺入量十年樹人擷梓杞桑聲譽藉藉延治庫藏南北  
偉績燦爛中行會計雖當功業殊渺置身社會求民溫飽堂堂大陸卓哉洪抱整頓乾坤濟時  
來了締造艱難馴臻大道酌盈劑虛冥搜窮討時濟國艱尤爲赤保哀益多寡堅貞智巧十有  
五載萬商之表戰雲正惡賴 公尤多箕尾遽去誰與枕戈商疆市域如失伏波我初識 公  
語謙氣和投紓恨晚漉酒顏酡心照神交始終無佗慨論時事擊節高歌每商出處太息執柯

一屢聚影五湖荷簑春煦秋陰迅羽擲梭述 公遺行魁奇嵯峨大庇天下良驚並羅 公尤  
疆博百家俱摩國有大事時相咨磋髯賓碩學車騎屢過摘詞傾峽縱口懸河曾幾何時春痕  
易磨拜 公遺像客淚滂沱嗚呼哀哉

愚弟俞家驥謹誄

# 輓聯

謹以收到先後爲次

學擅瀛海開新業

雲黯長淮惜哲人

孔祥熙

謀猷桑孔學富管商一代才華高上計

望重湖州道宗端木滿門桃李哭春風

弟子學忠

學術貫中西裕國經綸垂典範

勛名滿淮海盈階蘭桂紹箕裘

孫科

卅載經營貨殖昔傳書企業英才稱弟子

五湖寂寞陶朱今歸櫂趨庭計學付兒曹

愚弟羅文幹

負經濟長才滄海橫流空懷偉業  
警瑚璉重器昊天不弔遽作古人

閻錫山

寰宇慨戎氛太息人琴俱輟響  
薤歌傳噩耗驚聞仙馭遽歸真

王樹常

計然餘策還經國  
安定流風遠作人

萬福麟

通中外財政學識筭南北都市金融久已負盛名締造經營關國計

抱管子揀時偉略展陶朱致富宏圖無端成大極風雲慘淡惜英才

戴傳賢

陶朱本霸才奚止金融稱泰斗

向平了夙願頓教典則墜江淮

居正

市隱鬱奇才好附千秋貨殖傳

賢郎方纘業也應三復計然書

曾仲鳴撰句

商界推名流力果心精斟酌盈虛關國計

北征纔幾日聯鑣接席從容杯酒悼前塵

愚弟顧祝同

管商遺緒誰承嗣

津滬哀聲未忍聞

陳公博

金融導先河最慟人亡邦瘁

橫流挽滄海誰爲財阜民安

唐生智

抱士安主計宏才富國裕民資倚畀

讀宋玉招魂遺賦陳漿灑酒寄悲哀

徐源泉

陶猗管晏易地皆然歷歷數英才不愧江淮號多士  
經濟文章得天獨厚茫茫歸大化應爲家國惜斯人

孫傳芳

具創造本能富縝密思想事業成功原有自



肯擔負責任不愛惜精神年齡未永豈無因

齊燧卓元

經濟仰宏才何遽雲霄歸鶴馭

富強懷素志空教貨殖傳龍門

愚弟靳雲鵬

擅閱通淹雅長才心計周詳畢世精研經濟學

以忠誠勤儉自勵儒行昭著遺風爭仰老成型

王樹常

宏濟仗鴻才輔轂早欽劉晏采

貽謀傳燕翼鑿楹知有計然書

許世英

淮上舊論交往事卅年如夢寐

津門足投老長才九府痛凋摧

弟鄭洪年

碩畫劑盈虛興利衛民功垂不朽

盛年痛殞逝廉頑立懦永仰高風

劉瑞恒

負幹濟經獻小試長才已爲銀行放異彩

綜生平義舉追維往事愧無巨筆闡幽光

愚弟吳毓麟

早歲負英名計學有專長瀛海歸來倡實業

論才堪濟世艾年方晉四蓬山遽返悼斯人

愚弟張廣建

所舉百端即今論學績之宏感發淬厲蜚譽實多如君寧遜胡安定

欲成大業乃身負金融之重積勞衰病責任不逸有子况如孫仲謀

弟葉恭綽

重瀛績學負才名剏造樹宏規豈惟貨殖傳中羣推麀角  
廿載論交同骨肉亂離成訣別淒絕金蘭簿上孰共鷗盟

如小兄龔心湛

爲經濟學開新紀元小試宏才傳大陸  
奈財政家又弱一個悲觀逝水去長淮

愚弟齊耀

琳瑯

工惠商通共仰文章經濟

父作子述毋忘勤儉忠誠

弟鄒琳

仙露泣空盤華屋山邱同感逝

朔風吹落葉故鄉喬木不成春

愚弟胡惟德

九府劑盈虛先生信有擎天手  
一杯感零落當代猶思濟世才

弟王廣圻

救世早抱夷吾志

離世應從子晉遊

愚弟王揖唐

風儀感平生燕市笑談如昨日

儒林研貨殖龍門紀錄待他年

愚弟李思浩

時局正迍邅物阜財豐方賴宏才謀裕國

音容遽杳冥風悲雪涕從茲權量失長城

愚弟蔣廷梓

草創歷諸艱國難方殷疾病從生憐積苦

金融調百業溝通有術工商相嚮哭同聲

愚弟張軼歐

病急亂投醫憶豪情直上雲間都爲養生曾戒酒

舌僵難對語問春風又來蘋末更誰挾酒共看花

愚弟湯爾和

蕊榜憶同登經世早傳鹽鐵論

酒爐悲再過救時遽折棟樑才

年愚弟陳 錄

鷓得故人雄大陸

聊憑老淚悼長才

愚弟凌文淵

儻能竟公之所施其程功必巨

獨惜降年胡不永乃戡景而終

愚弟鍾鏗

身世歎浮雲塵夢初醒五夜鶻啼傷此日

琴書感同舍履痕猶在三山風好記當年

愚弟沈其昌

從三神山下趨來白壁早投時九府有聲蜚燕市

嗟萬頃堂邊不遠黃金空鑄像五湖無地著鷗夷

愚弟趙椿年

縮轂具長才一代經綸推管晏

庇寒開廣廈千秋歌頌徧江淮

弟鈕傳善

爲貨殖偉人廿載經營成大業 君嘗謂師友中最敬一人螺江太傅親戚中一人則指愚愧何敢當  
叨葭莩摯愛片言推許感知音

姻愚弟李經畚

夜氣識金銀富貴浮雲悲往事  
人生原夢幻江淮落日弔歸魂

愚弟商衍鎰

大業獨支持國難方殷管策范書堪共濟  
至交感零落老成又謝暮雲春樹總傷情

弟錢永銘

經濟足名家念締造艱難共悼老成遽凋謝

典型垂永則看發揚光大同欽哲嗣早蜚騰

愚弟商震

俠義久蜚聲回思傾蓋論交肝胆照人規復平津資協濟  
長才今永逝稔知創業維艱形神俱瘁幸承堂構有詒謀

愚弟南桂馨

樹南京中國銀行先聲猶有成規能世守

過兩等商業學堂舊址至今教澤尙堪思

愚弟仇繼恒

是一代經濟大家深明利用厚生要道

歎連年邦家多難又喪裕民富國瑰才

愚弟谷鍾秀

開經濟救國先聲名業千秋遙天風冷淮邊月



念肝胆照人舊雨琴罇數載往事心傷燕市塵

愚弟孫奐崙

本忠誠勤儉締造規模信譽允孚經濟界  
以孝友慈祥栽培子弟達人應慰夜臺心

吳鐵城

杼柚濟商艱貨幣日通儘有良規遺大陸  
箕裘延世澤義方不墜應無遺憾賈重泉

弟何豐林

瓊枝賭酒珠箔飄鐙於退閒時與君過從轉密  
菡萏方華蓮心自苦是解脫法非俗智識所通

愚弟夏仁虎

驅車過白下城十七年前如昨日

傾蓋道黑山事三千里外痛籌邊

弟俞鳳韶

胡天不弔令我堪悲正邦國咸欽經濟文章垂百世  
瘁盡宣南魂招淮北幸箕裘克紹典型功業著千秋

愚弟薛篤弼

負經濟宏猷小試長才已爲商家放異彩

綜生平義舉追維往事愧無巨筆誌幽宮

王靖國

大雅云亡青山綠水誰爲主

老成凋謝落花啼鳥總傷神

愚晚楊愛源

經濟負宏才實力攸資舉世正殷屬望

生平留治績大功未竟上天何不憖遺

何振東

誨人不倦積勞而死

精靈常存照耀如生

李服膺

開濟胸懷貽燕翼

安排身世舉鴻毛

弟王季緒

宣猷泉府馳譽瀛寰何期噩耗傳來未屆耆齡先怛化

既仰高才尤欽卓行到此同聲悼惜幸看遂起已騰驥

愚弟任傳榜

南宣木鐸北領金融濟國艱難時雨春風留偉業

才似江瀾品同嶽峙遺民惠澤鉢池淮水仰高賢

梁寒操

負經濟長才裕國利民成巨業  
綜生平行誼殊勛偉績足千秋

弟顏德慶

交好近五年憶曩時樽酒言歡議論胥堪經世  
相違纔一載念此日人琴俱杳老成尙有遺型

愚弟崔廷獻

偉績著泉刀籌計盈虛垂卅載  
大名齊管晏文章經濟並千秋

愚弟魯穆庭

負經濟宏才許世以身有功於國有功於民鵬鷲正摩霄一夕疾風摧勁翮

綜平生偉績大書其事或布在商或敷在政龍蛇悲發識三更夜雨弔英靈

愚弟林成秀

促膝憶長談除歲光陰成幻迹

浮生真若夢一身憂樂付空冥

愚弟劉哲

具范蠡富國才有子克家能繼業

讀向秀思舊賦聽人吹笛太傷神

愚弟鮑毓麟

一生事業昭東陸

九府才華仰北辰

愚弟婁裕

熊靈

其人負磊落英多之資以笥庫才高聲稱京邑

成功於陸鹽金中爲盛更理財術裕津逮後賢

愚弟方燕年

萬感總傷生人到有情心最苦

百年原是夢我來憑弔慟偏多

如小兄李湛田

立身在儒林貨殖之間最難萬國溝通獨抒籌策

商量以富庶教民爲務那得一年渴別遽絕人琴

弟賈士毅

一生以信義貞心差擬漢書著平準

二豎則膏盲成崇那堪商界失先型

鄔志豪

雲黯長空驚悉德星沉碧落

風淒大野頓教老友弔青冥

雲山散人江朝宗

忠厚存心市井咸親盛德

音容隔世經營空惜長才

愚弟宮邦鐸

燕市得新知詎意挂壁斷絃而今已矣

山陽如再過不必隔鄰聞笛亦自淒然

愚弟王章祐

學術富陶猗結駟連騎千古業

人生如泡幻燕山淮水一天愁

愚弟荆有岩

創造歷艱辛操奇計贏經濟重心推泰斗

劬勤勞眷顧虛懷若谷平生交誼感人琴

愚弟葛敬猷

經濟抱長才應有楷模遺後世

幽燕來噩耗每憶故舊總傷神

弟何競武

袁浦溯喬暉經國才猷啓宏緒

淮海悲逝水他年簡冊炳餘芬

愚弟錢宗澤

存亡見慣渾無淚

陵替日多又此才

年愚弟趙世瑄

國難痛方殷嘗胆臥薪公應不死



事業期待理推心置腹我負平生

如小兄王桂林

身與國無二理若能看出惟一的病源即能想出惟一的聖劑外禍橫飛華胄爲奴儉生可恥  
我交公卅餘年既甚佩其非常有才識尤甚望其非常有脩持噩音驚告靈魂皈佛論理何疑

愚弟徐佛蘇

彼此僅知名重神交堪稱益友  
文緣今不再爲國家痛惜斯人

愚弟魯嗣香

當代數聞人獨有賢聲振遐邇  
悲風驚噩耗空餘遺愛付滄桑

愚弟齊 爲

令望攸崇貨殖儒林堪合傳

盛年不永燕山淮水賦招魂

愚姪段茂瀾

實業具專才留念西北富藏宏願經營資利用  
浮生若大夢當此國家多難感懷情誼倍傷神

愚弟蘇體仁

事業既成兒孫繞膝看透了夢幻人生兄又何憾  
椿萱早背憂患頻年每想起提撕教誨我益增悲

愚弟何家駒

奮志一生宜有盛名稱沒世

論交十載愧無俠骨報知音

愚弟汪士元

昭其洪懿慷慨壯厲

守以敦篤遠近照明

愚弟鄧慶瀾

平準貨寶朝市知名論一生大業恢張華路經營懷楚子  
永好瓊琚京華憶舊賸客歲片時讌聚酒爐悽感在春申

愚弟陶家瑤

爲南北都市所宗裕國阜民能以經綸參幣府  
繼位業真靈而上達人明德早知光氣燭江淮

愚弟袁勵宸

藥石膏盲無起色

金融泰斗失斯人

谷正倫

年近週旬遺澤常留桑梓地

名高令子銜哀頓廢蓼莪篇

愚弟師景

雲山泉

白馬素車淒涼入夢

青天碧海惆悵招魂

陳興亞

情款永難忘廿載光陰如過客

謀猷應未沫百年紹述有佳兒

姻愚弟卞

福壽喜孫

生同里壯同遊長又同業卅載間艱苦共嘗相期不朽

兒成家女成室孫亦成行數旬中醫藥罔效遺憾何窮

表妹婿周作民

以計學開財界先聲名滿當時君真健者

乃積勞致河魚重疾誼叨同業我痛斯人

愚弟冷家驥

蕭條淮泗空儕輩推君隻手擎持成偉業  
寂寞芳膏歇山陽聞笛廿年交契感平生

愚弟惲寶惠

創業振聲華五湖未遂陶公志

識時誠俊傑一賦先凋賈傅年

愚弟曾廣勳

學成能致用偉業創興磊落英多豪士氣  
世難正思賢槃才遽逝凋零萎謝哲人悲

上海交通銀行

無智無得無苦集滅道乃至無老死

如露如電如夢幻泡景應作如是觀

愚弟丁道津集金剛句

調劑金融儘爲邦家倚賴

聞驚鶴駕尙有助業流傳

王棟

施教憶江南看桃李成陰經濟才長多碩彥

盛名馳冀北幸箕裘紹業詩書世守有傳人

愚弟水鈞韶

秉明鏡眼運抽繭思憶廿年如履如臨大業早標中外望

過杖家辰抱撤瑟痛有令子肯堂肯構相期不負死生交

如小弟許福晒率子世琦暨孫允恭

計然決策救時艱惜大功未竟

劉晏理財用士類非俗見所知

愚弟方燕庚

廿二載發攄抱負正賴青年苦學而成平地爲山締造艱難真健者  
剝那間銷沮英華彌歎蒼昊毀才之易迨天未雨商量邃密更何人

愚弟葉景葵

從遊早歲相得甚懽詎年來咫尺邸居便坐雅談時却少  
經濟閎才所樹者大惜際此艱難時事厚生利用願猶賒

虞熙正

講學上方胡安定

理財接武古陶朱

潘公展

四生九有同登華藏玄門

八難三塗共入毗盧性海

丹崖學兄冥中如此發願依 法起脩一朝頓悟必然立地遊於我 佛如來大寂滅海

弟林有壬拜頌敬錄二時課誦成句

雞黍舊情深記去秋菊徑風清扶病起爲東道主

鶯花春夢短歎此日蓬壺雲黯愴懷憑弔北邙山

世愚弟朱邦偉

廿餘年聲氣交親攻錯矢生平相期利濟同舟白首如新樽酒共

七旬日幽憂示疾彌留成永訣愁見束芻祭告黃腸遽掩繡幃飄

如弟萬弼臣

三十載論交肝膽相期遺恨何窮媿知己

七旬餘臥病彌留不語傷心無限付兒曹

孀如兄阮性言



廿年來相隨杖寫溯自經營大業費幾多才力精神擘畫仗元勛風雨同舟依郭泰  
四旬耳暫別襟裾每思傾聽深譚說不盡私交公誼驚疑傳惡耗人天歧路失鍾期

葉 薰

二十年患難相依盟締蒹葭情如骨肉  
數千里倉皇赴弔公喪山斗私痛人琴

姻小兄俞紀琦

青年投分白首猶新風雨感同舟方冀苦心常共濟  
金石長堅芝蘭永契驪駒歌幾日獨傷揮手竟西歸

如弟沈爾昌

瞻念精神師未死  
愴懷遺訓我虛生

受業李 政

於金融界維君爲闢莽榛鉅者畢舉細亦靡遺尤難勇負仔肩肇畫萬端任重投艱眞况瘁  
在知交中對我時披肝胆過偷相規善還共勉詎道愴嬰末疾倉皇一瞑撫今追昔倍淒其

姻愚弟卓定謀

有前賢先覺胸襟備蒙飲食教悔幾及廿年倏忽小遊仙貝葉罡風蝴蝶夢  
是儒者本來面目應許弓冶箕裘傳之百世陽和新布化杏花春雨鷓鴣天

受業厲鼎模

一千里負篋金陵親承訓悔從知我師素志爲國憂貧回首水自東流事如昨日  
十九年握籌燕市頻感提携尤佩總理平時以身作則最痛心棺方南下人已千秋

受業楊祖頤

同學廿餘人才氣縱橫君第一  
論交四十載愴懷今昔淚偏多

姻世如弟路孝植

弱齡立雪壯歲從風往事真隨流水去

嬌客乘龍佳兒跨竈今朝好慰在天知

受業凌宴池

經濟負長才天欲使實業興胡不憇遺一老

邦家正多難誰能呼故人起相期共挽狂瀾

愚弟吳大業

燈火憶兒時游釣處風景依然舊夢驚回自愧鬚眉仍故我

交情兼累代指顧問仙凡永隔前塵宛在痛揮涕淚更悲君

世愚弟朱之恒

東瀛共硯舊侶慨已凋零惟君建樹功成方幸調劑金融國計民生胥利賴

南下歸裝走別猶勞眷注媿我經營力拙有負平生期許撫今追昔失儀型

愚弟沈祚延

貨殖早傳名天不假年平居不享林泉樂  
葭李承末誼子能繼志大業重看堂構光

姨甥唐祥鳳

中外著聲名每見會要驚偉略  
英華嘆銷歇忍教平準讀遺書

白振武  
李治本

論交在三十年前患難相依更託葭李叨德誼  
際隔于二千里外噩耗忽至難憑驛使弔生芻

小兄郝壽頤

一慟復何言千里相親人入夢  
九原如可作百身願贖我當先

同學弟吳淵

居積富才猷陶朱公小試經營已使燕山數魁傑  
老成傷凋謝丁令威重來臨睨定驚朔漠有滄桑

愚姪畢正宣

萬方一嘅吾道何之數平生講舍宣猷寔瀛洲業積德百年勞景仰  
冠蓋京華斯人顛顛便此日招魂作賦執紼興哀遺言一晌費低徊

受業茅以昇

廿載憶追隨籌策高明文彩風流長不朽

千秋成永訣悒悒幸列感恩知己兩銜悲

愚晚田煥雲

昨歲猥承推挽暫息游踪此惠感難忘豈祇廿年交誼舊  
一時方賴賢勞况丁劫運斯人傷不愆定知四海涕洟多

愚弟陳宗蕃

昔年仰荷提撕父子銜恩齊墮淚  
霎時遽悲奄化薦蘿失蔭倍傷神

姻愚弟常嗣榮

師訓竟長違卅載追隨同沾化雨  
心喪無限慟脩身黽勉莫負春風

受業袁力德

自東瀛返棹便思以經濟名家廿載矢精勤太史有情傳貨殖  
向西土歸旛問此後音容何處四時增感喟同人無福失模型

大陸銀行全體同人

教宣木鐸職領金融才富正當年胡竟掩晨星而西歿  
社會欽崇邦家倚重聲華方益代何忽隨秋雁以南飛

愚弟劉景山

以幹濟長才握金融樞紐籌國計瞻民生慘淡經營遺恨未終厥志  
具人倫藻鑑爲末俗南針攬名流培寒峻光明磊落允宜垂裕後昆

姨甥沈

鼎 履 謙  
清

大雅云亡空懷舊雨

哲人其萎悵望醇風

愚弟許照勝

創大陸有聲衆望所歸儼如曠日

正長城聞驚國魂安在又隕台星

姻愚姪郝昭宓

畢生理財堪稱國手

繼起有子克振家聲

愚弟凌昌炎

冀北相依論誼幾同手足况頻年蹤跡尤親語絮爐溫回首恍如前日事  
淮南暫返臨歧猶共笑言詎再見音容頓減風淒月冷傷心難覓活人方

愚弟丁玉翔

頻年獎掖倍恆常最難忘銜命淮壖興學代宣勤梓里於今歌德澤  
一旦英賢驚委化更那堪心傷梁木望雲空隕涕漢皋何日接音容

受業李宏增

忠厚存心銀錢行稱盛德  
音容隔世經濟界惜長才

北平鴻慶裕銀號 周潤德  
孟節之

先姻姪而後師生念年左右追隨訓誨餽貽銘厚德  
求學問乃成事業一旦神骸溘逝金融教育悼遺型

弟丁毓萱



憶東閣初接風儀事隔三年言猶在耳  
歸西方極樂世界名垂千古死亦如生

愚晚白瑞麟

經濟仰宏才折軸修途天不弔  
知交懷早歲停雲八表道應孤

愚弟鄭良

大業共艱難碩畫親承欽教澤  
沈疴終不起遺規猶在仰先賢

弟王滌

創業難守業更難與吾姊泉壤相逢應道有子多才克紹箕裘無遺憾  
中醫誤西醫再誤慟哲人音容頓杳翻恨長途遠隔未陳觴豆有餘哀

弟王國勳

頻歲託清塵細流無補江河大

新春驚噩耗實業同悲柱石才

何  
燁

程門陶鑄杜厦併幪幼學壯行常依愛日

痛失趨庭悲銜築室去年今歲同泣昊天

受業許兆鳳

績學慕范鳴夷肇劃從容紓國計

曠才如劉正字經營艱苦裕民生

愚弟李壽金

溯曩年南國結盟幾經水榭移船鐙樓喚酒

慟前歲西冷語別虛訂湖山後約風月清遊

如小兄孫錫祺

大業已崢嶸幸奕葉多才撒手應無遺憾在  
論交何懇摯悵涓埃未答感懷空對舊盟存

如弟陳介

菊徑荒涼喬陰莫仰

蓉城縹緲仙馭難廻

愚弟章玉猷

十載賦同袍記當時求友嚶鳴五鳳齊飛光奕業  
長途遲旅櫬可堪此臨流設奠大江疊浪咽哀聲

愚弟胡筠

月照寒楓空谷深山徒泣淚

霜逢宿草素車白馬更傷情

張裕岫

酌濟通天下之財利民利國

勞瘁伏中年而後斯疾斯人

愚弟田步蟾

開中華財政界新紀元勸我公云亡怕說奇才能裕國  
貽後輩經濟學善知識與賢郎共事早欽明德有傳人

愚姪吳子方

陋質荷栽培十餘年南北相依懿訓嘉言猶在耳  
沉疴窮藥餌一霎時音容頓杳深情摯愛敢忘心

姻世如姪何維旭

十載滯京華屢沐春風榮小草

一朝聞噩耗頓悲廣蔭失喬松

姻世愚姪朱晉榮

居闔閭中宛然具儒雅氣象豪傑襟懷求諸當今能有幾  
於金融內誰不頌端木才高陶朱學富傷哉長別竟何堪

宏慈廣濟寺退居現明偕住持顯宗

事業濟金融碩學豈惟儕管仲  
簡編傳貨殖盛名實欲邁陶朱

愚弟吳乃琛

淮海富人文三徙成名才更卓  
蓬山同學業一時回想夢都非

同學弟曾 牖

育才興學舊同舟更兒曹曲荷裁成公誼私情具感慟  
挾策理財今巨擘羨有子繼承軌範大名盛業允昭垂

弟胡元倅

交憶廿年餘流水有人彈古調  
春回三月暮閒雲何處弔歸魂

姜文華

接物慈祥持躬峻潔綜立德立功立言未竟赤誠奄忽頓驚梁木壞  
求才蹀躞勛士殷拳願矢清矢勤矢慎一遵嘉誨彷徨永袞雪門哀

受業史久衡

六袞婆娑埋頭作模楷  
一朝大覺撒手脫塵寰

顧興煦

剏辦著鴻勛長教大陸新基名馳環海  
倦勤返鶴駕曷禁支行同事淚灑錢江

大陸銀行浙支行同人

經濟展鴻圖自昔市塵欽碩望  
雲霄迴鶴馭而今闔闔失長才

王夔

經濟名家遺志堪承欣有子  
艱難創業後來大啓待諸賢

愚弟李公復

起疾未能敢以死生歸命數  
相成何厚祇餘知感結幽明

愚弟方石珊

是教育家是理財家是實業家數千里負笈擔簦汗漫歷重瀛歸國共瞻規畫遠  
能識拔我能訓誨我能衣食我廿五年感恩知己剎那皈淨土及門相嚮涕洟多

受業許鴻賓

都門一別忽經年回憶當時已訝容顏非昔比  
塵世千場原是夢悵懷舊雨不知涕淚竟何從

愚弟  
盧學溥  
胡祖同

十四載丕基手創久託帡幪歷來經濟宏敷借箸難忘憑計術  
一霎那噩耗心傷頓摧梁棟此後英靈如在同舟共勉守蕭規

大陸銀行滬行全體同人

松柏曾依迴首清音傷薊北

蒿蘿幸託驚心噩耗到江南

張  
厥

實業家內再無二人迴思厚誼高情避地東來常在抱  
同學輩中又弱一個且歎生離死別臨風西望祇傷心

同學弟李成林



侍雪記初冬握手河橋曾示規模期遠大  
傷春傳噩耗驚心驛柳自慚檣櫟負提携

世愚姪錢鴻元

二十年道義論交憶君園府策勛每共清譚最知己  
三千里噩音驚報悵我戎帷羈跡未親訣別太酸辛

愚弟王固磐

盛年抱用世之材樽酒話生平從知肝胆照人能以一言存魯國  
痼疾是交親所歎虞歌催急景愁見龍蛇厄歲不成三徙殞陶公

愚弟黃榮良

遺愛難忘遠祝馨香方共奠  
宏規宛在劇傷山斗尙同欽

大陸銀行上海儲蓄部全體  
信託

經綸眞已矣劇傷賫志以終萬里相期日愧散材辜厚望  
囊橐更蕭然仰見處膏不潤九原可作永留遺範在羣倫

世愚姪沈元鼎

瀛海賦同舟一霎雲烟如夢幻

燕山弔空谷卅年風雨遽飄零

同學弟魏潤浦

公抱熱血一腔遺恨黃泉壯志未灰身遽隕

我充濫竽十載荷垂青眼返魂無術淚空揮

陳緘

碧海潮空此日扶桑龍化去

黃山月冷何時華表鶴歸來

劉敬宜

三十年猶記傳燈永懷風義

二千里忽驚歸櫬彌感人琴

受業張毓駿

十餘年締造艱難劉宴才高商界齊聲稱泰斗

兩閱月病魔纏繞陶朱仙去同人咸悼失長城

南京大陸銀行同人

救國以金融調劑爲宗管子奇才卅載相依承厚愛

處世本忠恕和平是尙哲人竟萎隔江遙奠倍傷心

愚弟陳 緘

八旬前驪唱非遙遠道情牽病榻養疴頓傳噩耗

五十載雁行忽斷同堂誼篤憑棺痛哭深悔遲來

功服兄飴 孫

天禍閩浮公從茲脫離蓋纏利鎖名縉皆慧業  
春歸江上我到此歎歎涕洟素車白馬爲招魂

程錫庚

握經濟霸權畫及民生此日應召玉樓圻憶遺暉掬熱淚  
操陶朱事業德昭社會他年國強庶富敬馨三瓣薦千秋

歸綏印花稅局全體職員

調濟擅長才每思阻隔天涯想望豐姿眞若渴  
度支稱計相忽道崩頽泰斗維持經濟更何人

李錫純

十年備荷生成廕庇室家方冀孺私常有託  
一載遽爲永訣情深骨肉從今慈範仰無期

姪婿賀良瑜  
女琴

是理財家是教育家經世宏謀心血瘁  
念在民生功在社會採時碩彥口碑香

愚弟陳紀彝

事業動關興國計

艱危彌愴濟時才

羅常

富國裕謨猷海市龍蛇操萬變

哀時失豪俊淮山猿鶴愴千秋

周鳴皋

萍水本無常白下相逢逾廿載

事功猶未竟赤忱已足照千秋

愚弟馬文蔚

夙佩天才精綜核

堪嗟國難失賢豪

愚弟江天鐸

九府濬泉源且暮盈虛勞擘畫

百年馳電景山邱零落動哀吟

愚弟許保之

泉府具宏規締造經營裕國當年多偉績

蘭階承舊業發揮光大箕裘此日有賢聲

任鴻雋

是日通才國計民生胥在抱

曾不中壽春歸花謝欲無言

北平貧民救濟所  
彥 惠

經濟數通才廿載聲名傳冀北  
耆英凋碩果千秋悵望說淮中

李保齡

病魔入夢竟何如縱教禽戲華陀妙手奈乏回天力  
厚望在人應不泯卻看鶴歸丁令傷心忍賦遊仙詩

愚弟張訓欽

早歲託旃幃附驥名彰深愧輕材辜厚望  
一朝捐館舍騎鯨仙去豈惟商界惜斯人

王葆恒

負笈赴東瀛記曾晨夕過從昔日早欽劉晏譽  
渡杯返西竺太息朋儕寥落臨風徒抱巨卿哀

愚弟陶孟和

志邁羣倫身留遠業  
神歸故里名在舊京

周炎

爲曾商界育人材多士雲從掌教多年勞規劃  
別向金融關途徑四行基立締聯同業費經營

鄭之蕃

主計弱長才翻歌雉露  
修文今赴召空仰高風

陸元燁

碩畫整金融憶當年裕國惠民共仰生財多大道  
仙踪還玉宇悵此日內憂外患問誰滄海障橫流

愚弟余上沅



憶昔日朱周建樹公起異軍大業共無疆淮水湯湯名不朽  
欣盈門桃李穠華子堪繼志僊踪傷永逝燕雲黯黯市停春

馬文森

利用阜民財袖有史公貨殖傳  
採時懷國士篋遺賈傅治安書

愚弟何元瀚

殘月冷空山避穀已隨黃石去  
寒雲佞野渡束芻今悵素車來

牛續瑄

孳精經濟調劑金融識卓更才雄畢世設施原夙學  
溝通工商聯合營業志酬胡運蹇一朝怛化失靈光

梅炤琦

功得於人間使感梓桑宏化雨  
吟魂歸天上頓教社會失慈航

周蔭庭

遺範足千秋調劑度支垂信史  
歸真當二月驚傳陸逝動春愁

白鵬飛

經濟本專家奈偉業方中忽驚怛化  
死生歸定數羨賢郎繼起克紹遺徽

愚弟王承吉

文章永叔瀧岡表  
政事夷吾貨殖書

愚姪張星煊

規畫邁羣倫締造經營領袖金融推先進  
英魂輝上界流風餘韵精神靈照仰高蹤

張英華

高飛不視乘風而舉

壽考且神與福俱行

愚弟盧開椿集易林句

才大邁羣倫和衆豐財陸地縱橫資擘畫  
心清拂塵服乘風御氣海天寥闊任遨遊

愚弟王文豹

實業樹先聲籌策風宣校啟江南敷教澤  
共學進前軌滄桑世變羣空冀北惜長才

姻愚弟孫多甸

公抱管鮑才方期經濟宏施我國有賴  
世無扁倉術竟使老成凋謝厥疾不瘳

李樹春

本林泉風格爲經濟名家最難中表情親骨肉死生同急難  
曾瀛海邇來又蓬萊仙去此後孤懷誰釋關山月夜倍思君

表弟田養

頌頌頌

世事已無常空留塵榻

音容何處覓悵望人琴

愚弟殷煥然

寇氛肆虐薄海同驚感慨滄桑公遽逝  
梁木其摧後生安仰徘徊門館我尤傷

世愚姪蔡一諤

壯志竟成名商業經綸皆模範  
後昆能繼美他年展布更巍峨

世愚姪李彝

頻年酌盈劑虛造福金融長留遺澤  
平日扶危拯溺垂惠後世共仰英風

林紓規

富庶勝天工一片丹心維世道  
謀猷宏國計千秋青史痛斯人

愚弟李玉麟

君有劉勰雕龍文藝  
我悲賈生賦鵬年華

天津祥記紙行

大陸奏成功居心惠沾無量數  
名揚曾接迹屈指依稀廿五年

年愚弟盧弼

碧海潮空此日扶桑乘龍去

黃山月冷何時華表跨鶴來

北平正陽銀號

謝鑑秋  
耿棣華

經濟失長才閨厄黃楊悲大陸

音容懷雅度神游碧落憶汪洋

愚弟朱清華

文通重譯績懋豐財同輩仰先型太息祇分留矩矱

我困俗塵君歸淨土萬方正多難登臨誰共覽風雲

弟謝祖元

桑孔富奇書朝市蜚聲孚義問  
弓裘有文梓塵寰撒手駕遊僊

世愚姪王慎名

二十年匡扶世運縱令掌握金衡盛德詒人清貧舍我  
三千里緬懷淵度何堪棖觸前游春紅水綠故國魂銷

侍徐行恭

經濟仰專長大展鴻圖關國計  
淒涼驚永逝豈徒燕市惜賢才

方鶴洲

計學貫東西鍾毓足增淮泗色  
哀音動南北魁奇痛失管商才

丁光煦  
李清範

蘭亭少長悲陳迹

玉局風光歎化身

愚弟葉崇勳

耆望同瞻名垂奕世

老成凋謝澤留後昆

愚姪袁同禮

經濟說專家全幅精神宏大陸

才猷貫中夏半生心血奠寰瀛

姻世愚姪夏寧湖率子瑞芝

騎鯨夜冷湖邊月

駕鶴朝棲嶺上雲

楊潤之



文苑早蜚聲爲經濟專家裕國福民昭政績  
春風傳噩耗慟神仙歸去道山佛海證前因

愚表姪田蔭均

昔年化雨親沾經濟淵源每飯未嘗忘面命  
此日乘雲遽去蒼涼瞻泰斗東芻何限感心喪

門生曹天受

南宣木鐸北領金融偉業足千秋先生不死  
東熾狼燠西歸鶴馭春風難再坐弟子何堪

受業李錯

何處可招魂檢篋尙遺元草在  
爲君欲掛劍登堂空憶白雲留

天津永信蔚顏料莊

爲今時經濟名家縮穀金融利用阜財昭盛績  
正斯世風雲滿地騎箕上界熱香酌酒弔前賢

李華培

殘月冷空山辟穀已隨黃石去  
寒雲低野渡束髮空悵素車來

天津長盛裕顏料莊

國家失一名卿四海蒼生虛卜夢  
商賈有五方岳萬年經濟作人師

天津慶德成黃鑑塘

武庫擅長才數十年創造經營利用厚生成偉業  
仁峴叨福蔭頻歲來提携教誨山頽木壞痛師資

受業楊祖蔭

卅載交情不堪回溯

千秋訣別無限哀思

如仲劉傳綽率子  
澄樞

負阜濟功能轉眼前生留偉業

緬經營宏廓共嗟上界靳奇才

愚弟范樞泰

十載荷鴻慈由津而調青調哈僕僕萍踪恨未常聆金石訓

一朝驚鶴化輒歎如斯人斯疾悠悠蒼昊緣何不佑棟梁才

教晚劉潤誠

南宣木鐸北領金融國計民生資壁畫

業懋陶猗功崇商管雲垂海立想音容

方東

令德永昭才綜五都之轂  
遺型羣仰學溝萬國使通

孫炳章

置身擬在無懷世  
礪石爲題有道碑

愚弟朱寶人

菊徑荒涼喬陰失仰  
蓉城縹渺仙馭難回

天津福盛厚元記紙莊

自昔商場推巨擘  
從今才界失完人

章襄琛

與郎君共學因獲登龍少小名志交十載相親消鄙吝  
爲事業求才乃邀識駿平生知遇感萬方多難失瞻依

世愚姪陳裕祺

平準書成自有千古其才駕卜式陶朱而上  
鼙鼓聲中又弱一個招魂在楓青塞黑之間

基泰工程司

經濟羨長猷何期造物不仁憾事憑傳鵬鳥賦  
愛勞成痼疾太息才人無祿霎時遽駕鸞駟飛

李書華

大雅云亡綠水青山誰作主  
老成凋謝落花啼鳥總傷神

愚弟穆德榮

勤教誨嚴課程  
桃李同悲胡安定  
謀富強急生產  
規模共仰越大夫

李蒸

未弭前思頓成永別  
追尋笑緒皆爲悲端

愚弟章玉猷

經濟足匡時  
淮水鍾靈生此彥  
聲華懷永日  
道山返璞失斯人

黃宗法

大雅云亡空懷往事  
頓成永別未弭前思

愚弟李榮桂率子鴻  
舉

經濟展鴻圖興利惠民回首杜梁瞻落月  
雲天驚鶴馭歸真返璞傷心魯殿圮靈光

愚弟周振聲

令聞着當時利用厚生展素願  
渠型垂後世鶯飛草長弔歸魂

汪申

先正云亡后生安仰

燕雲在望淮水增悽

愚弟馬雲程

責任心重犧牲力強南北京行業經營條例章程不亞於平準專書貨殖列傳  
體質衰萎手足麻木中西醫神方療治膏盲疾病無奈何腦筋絞盡氣血耗枯

謙元泰  
張桐軒五

理財具中外遠觀廿載主樞機方看建業垂名舉世推崇爲泰斗  
成佛值國家多難千軍揚鞞鼓太息籌捐助餉中原痛哭失長城

愚弟王昌文

棄宦途入商界追踪范蠡氣概

行義路履禮門不愧君子流風

福源昌酒店

李樹清  
趙銓成  
李寶成

精研經濟樂育英才平生德業所周無數奇材受繩尺  
秉荷鈞衡追陪談讌回首音容如在一時喬木失瞻依

世愚姪

李屏軒  
袁力衛  
嚴之衛

飛揚湖海仰人豪可堪濁酒招魂西去淒涼悲易箠  
零落山邱懷舊友猶憶去年握手北遊談笑喜同舟

愚弟李承翼



於講學見識韻於阜財見偉畫於綜理見猷爲梓舍紹弓裘四海交遊推少伯  
念煥沐在金陵念睽違在江漢念彌留在京國蓬瀛空悵望九州風雨哭先生

受業劉 翼

遊迹返東瀛爲商學界陶鑄人才席踞高頭經濟萬言儲國用  
豪情如北海以金融力維持時勢筆推大手淵源一脈溯師承

受業方 棟

羣從汝惟賢晤談回遡京塵再易隆冬成永訣  
行年吾漸邁興替念關門祚頻揮老泪復何言

叔氏善 吾

地下又添高士伴

生前原作古人看

愚弟許照勝

一嘆未竟平生志

百代長留濟世心

馮友蘭

計學擅專門志在阜民功不朽

克家有肖子孝能繼武業維新

愚弟譚文熹

粹於學長於才卓犖宜成不朽業

繼其功述其志贊緒猶多後起英

世愚姪周仲千

負一時盛名貴能歆然不自足

纔百年過半奈何忽焉竟云亡

愚弟林康侯

是吾黨之先師有爲有守  
借他山以攻錯亦步亦趨

徐世潤

是教育家是政治家又是實業家槃槃大才君真健者  
爲談氏惜爲商界惜更爲中國惜茫茫後進誰其嗣之

天津華中印刷局陳慰農

究商業學抱社會觀早知救國理財非二事  
以經濟家發慈悲願直合夷吾少伯爲一人

趙琪

五都增轂萬國通財自有經綸宏締造  
兩世交親一門英彥可堪風雨憶生平

世愚姪李斌緒

經濟展鴻圖自昔市廛欽碩望  
雲霄迴鶴馭而今寔實失長才

愚弟俞人鳳

遺跡堪傳典型在望  
至誠所格金石爲開

馮英

商學著先鞭志切富強興實業  
道山今返駕常留軌範在人間

愚晚劉煦東

一身經濟匡時局  
千古模猷重計綱

愚弟楊士香

蘭渚羣遊已悲陳迹

蓉城仙去空仰遺型

陳石泉

長夢竟無回英爽獨懸孤月朗

故鄉應在念旅魂空逐五雲飛

章榮初

課士育英才至今共仰師宗譽滿江淮流不盡

經商抒遠略有子更承堂構信孚歐亞澤均霑

愚弟張 棻率子繼瑞

遺訓聖人言留得真誠傳後世

傷心猶子淚何堪家國哭長城

功服姪念曾

與先生同抱富國祐民之謨典型頓失

惟哲嗣早精平準計然之學弓冶相傳

愚弟史竹湘

南宣木鐸北領金融計學精深久馳令譽

國難當前民生愈困哲人怛化共起哀思

愚弟徐青甫

讀計然書學有所長大隱在市朝宏濟周官泉府涸

若端木子億則屢中雄財操國趣奈占羲易假年難

弟蔡倪培率子覺

平準已成書阜財早許稱先覺

遺型還照世大業今看付後賢

愚弟鄭天錫

訂交近廿餘年識卓才雄爲銀行團中泰山北斗  
創業遍十數省惠民利國是貨殖傳上端木陶朱

愚弟湯文鎮

有管子富國之謨應世樹人宗實學  
微劉晏理財何術感時撫事惜斯人

愚弟麥泗泉

負鼎鼐經猷小試長才已爲中華放異彩  
值國家多難遽歸大暮那堪斗酒哭斯人

弟朱鶴翔

計學先進商校導師東渡毓英才勤儉忠誠疇抗手  
萬國溝通五都宗仰西歸證極樂生存零落劇酸心

鄉愚弟劉春圃

白馬素車愁入夢

青天碧海悵招魂

畢桂芳率子文秉

計政樹鴻規福國利民淮泗由來多俊傑  
異邦交哲嗣象賢繼美淵源有自識驂騑

世晚潘序倫

洄溯深仁猶執謙恭延後輩

緬懷厚澤更教悲咽哭先生

教晚顧寶善

百德皆豐獨嗇年兮天憤憤

經春小別既傷逝者世冥冥

黃濬



竹徑淒涼平生壯志三更夢

雲山縹渺萬里秋風一雁哀

天津泰隆號

達惠槃才萬流共仰

山積木壞千古興悲

愚弟于稚武

事業已歸前輩錄

典型留與後人看

姻晚張萬里

計學啓後進新知簿記創規程益復設校儲材羣欽志慮超儕輩  
當代負聞人偉望金融舒籌策太息鞠躬盡瘁我亦低徊惜此才

愚弟徐鶴橋

淮水毓英賢往績爲舉世所推下阜民生上紓國用  
燕京傳噩耗珥筆試代公作傳人稱貨殖我仰儒修

唐海安

異邦結契同榜列名知己溯從前卅載相交慚晚進  
家事不安國難未已故人語最後去年一別卽長眠

愚弟劉相

經濟爲懷公望平生操國趣

僚函長往生芻一掬痛交期

愚弟陳家棟率子聲翔

萬里人歸言念長才幽薊雲山齊在目

一番花信傳來噩耗楚天風雨倍愴神

軍事參議院中將參議陶放禮

發揚經濟整頓金融一生抱負非凡桃李乍成陰儘有文章傳子弟  
鞏固財源修明稅則廿載勵精圖治桑榆嗟晚景空將事業付兒孫

愚姪王鏤泉

緬公負宏濟長才貨殖儒行一身皆備

綜君樹生平大業惠民阜國百世共欽

愚弟溫惠泉

閑規遠識南北可驂斬者祇五六人說士比登龍廣廈大裘流澤厚  
雅度清襟周旋於尊俎間垂三十載赴書驚化鶴杏花春雨淚痕多

愚弟唐壽民

居經濟中落落然有儒生氣象求諸當今能有幾  
於財政內拳拳者惟一片熱心傷哉長別竟何堪

德華銀行

李德清  
苗景煌

接席三秋民清而還公於經濟界已推巨擘  
別離五載津沽以下今之實業家共仰斯人

羅蓬瀛率子春山

爲銀行界闢新紀元草創蕭規貨殖儒林今合傳  
豈白玉樓有修文詔花生江筆大羅胥夢此歸魂

北平慈善會會長孫晉卿

少承訓誨壯托帡幪二十年肺腑相推每思大業中堅共賴蠡然攄碩畫  
外切憂勤內蒙激刺三閱月膏盲莫挽慘覩靈輻南返何期佺偃沮修齡

受業門人石寶珪

經濟研深學有本末  
勤勞備至世所欽崇

方若愚

世道多嶮巇披棘斬荆每歎駑駘愧我  
遺行足模楷扶危濟困常懷肝胆照人

愚弟王達

商學擅專長昕夕惟勤太和傷乎成幻夢  
鄉萍能永著言行有道賢嗣允矣績勳名

世愚姪胡道維

感頻年大厦共依豈獨教無不至  
慟此後吾徒安仰弗知涕之何從

受業

譚胸  
許國瓊

生同年居同里同學同遊胡期遽判幽明回首憶前塵撫案未能忘劍佩  
言有方行有表有爲有守任事不遺巨細精心成大業惜春寧止感人琴

表姪陳福頤

夢奠淮南江雪色變

招魂薊北燕樹陰籠

李麟玉

具管商富國治兵之才  
握算持籌調濟金融熙應績  
以舜禹康民阜務爲志  
設行造士汪洋海量納羣流

愚弟尹扶一

君乃勇於義者以公益爲懷  
不恤殫勞一世  
人固無如天也奈老成長謝  
祇留遺愛千秋

侯家源

抱不世長才而隱身塵市  
致勝賴出奇卽假金融挽國勢  
存大悲至願以援手親隣  
周急常捨己直同霖雨度蒼生

睦健常

入座憶春風屈指十年品節廉隅資砥礪

同舟傷舊雨又弱一個菁莪棧樸失栽培

平民大學校長湯薌銘

大事業手創得來裕國利民北斗泰山同仰止

小遊仙神歸何處鳥啼花落素車白馬倍淒其

愚姪周寶楚

憶昔財政紊亂之秋曾記管度支講會計以大展經綸裕國便民調劑金融通海外  
奈當銀業振興之際忽然却塵俗隸仙班而空留模範撫時增感難禁珠淚洒江濱

濟南市商會主席張叔衡

抱經濟宏才富國裕民鐘鼎銘勳傳不朽

謀工商偉業從公戮力林泉仰望悵無緣

新泰興洋行全體同人

忠誠勤儉是吾師靡敢告勞云胡不瘁  
經濟文章爲世冠上而幹國下以傳家

姻小弟費筠農

天不憖遺空懷舊雨  
我將安仰悵望醇風

愚弟王驥

以經濟發展實業造富強之基名哲交推智仁勇  
夙學子爲世儲才得家國之要社會同稱日月星

南通趙子美

寰海烽烟猶存大陸  
半身經濟實惠吾民

弟胡百生



規矧共傾心四字良箴尤足法

塵寰今撒手千秋華表永流芳

何炳麟 周作臣 任寶謙  
陳葆琛 吳廷芝 劉德富 閔熙麟

負劉晏才調濟社會金融燕翼貽謀綿世澤  
工計然學研精國家經濟鳳毛媲美紹心傳

趙啓驥

韶齡言志惟君與操卅載判雲泥兄據上都吾故土

計學傳家達人後萬夫擁領袖父揆大陸子中央

鄉愚弟朱紹武

人壽幾何時最難歿世猶稱是經濟專家孤寒生佛  
江流渺無際料得羈魂可慰有鳳毛繼美燕翼貽謀

于小川

負幹濟經猷小試長才已爲商家放異彩  
綜生平義舉追惟往事愧無巨筆誌幽宮

天津同康號新記伊延生

計學仰專家試看內察國情外採歐制一心中管商救時非僅名區充市隱  
真人返天際回憶五都筭數萬邦溝通廿年來陶猗創業至今大陸阜民財

劉月鋤

天上星沈同情卓識雄才身騎箕尾  
人間雨泣堪佩經營貨殖澤在民生

張秀升

學本經濟專長裕國福民功最烈  
才稱商屨巨擘圭型垂世死猶生

蔣士  
偉敏

貨殖本儒行調濟金融譽播中外  
交游重俠義名歸玉闕感隔幽明

愚弟王錫符

金融克定端資偉畫維持非若陶朱侈富  
國難方殷詎意遊仙歸去豈惟淮泗興悲

王毅

君竟長逝矣經濟權衡社會欽崇何期噩耗傳來到處同聲一哭  
公不少留耶金融調劑邦國依重忽爾騎鯨歸去那堪頓失遺容

孫梅堂

本學術以經營締造艱艱裕民即可富國  
緬遺徽之宛在忠誠勤儉盛德自具長才

弟李居義

興利惠民破浪歸來懋功績  
鞠躬盡瘁乘風化去邈山河

愚弟葉瑞國

求學記東瀛蔚我經濟  
英聲留大陸永悼人琴

韓仲勉

名望重鄉閭事業永題前輩錄  
精靈歸斗極典型留與後人看

愚弟謝奮程

舊事感飄萍記公海上歸來籌筆相從驂斬一堂慙碌碌  
噩音傳析木悵我江濱望斷東芻空奠蜺旌千里過匆匆

袁惠恒

絕緒拓千秋泉府規周計相撫漢  
長才蓋一世遺愛在此教澤流南

王平

理金庫固金湯是金融界惟一先進  
阜民財開民智爲民國史有數聞人

大陸銀行漢口分支行同人

大雅云亡綠水青山誰作主

老成凋謝落花啼鳥總傷神

和聚永

扶桑此日騎鯨去

華表何年化鶴來

馮海嶽

學術采東瀛經濟富強克建我邦實業  
音容歸蓬島忠誠孝友堪爲後進懿型

世愚姪田俊祥

訓誨記常承頻年服務津門道阻難償親炙願  
涓埃慚未答剎那歸真闋苑心傷空切大招哀

世愚姪秦曾慰

戚誼託苔岑追憶蘭言如昨夢  
苗嗣能繼武欣看玉樹總層霄

姻愚弟卞喜孫

遺愛溯江南廿餘年教澤親承方竭駑駘勉効微勞輔大業  
哀聲動河北兩閱月沈疴不起頓摧梁木忍隨同學哭恩師

門生曹漢

燕北阜財工商交濟

淮南慈幼教養兼施

楊鳳岡

卅餘年以道義勗勉交遊明哲云亡回首杜梁瞻落月  
十數載賴經濟維持國政修文赴召傷心魯殿圮靈光

愚弟高增秩

公抱管鮑才正思我商有賴

世無扁倉術竟使厥疾不瘳

天津同泰祥李春生

時雨溥江南商業菁莪霑教化

暮雲摧冀北金融泰斗失儀型

愚弟倪道杰偕弟道炯

時事正需才那得昇仙脫塵世  
精神原不死留將宏業炳寰區

愚弟

丙世第  
蘇卓第

公抱經濟才去年重見病帷和淚共談當世事  
我深知己感此後萬間廣廈相期無負故人心

晚生

關頌聲  
朱彬

望重枌榆名騰京國

悲生薤露哀滿人寰

尹羣

外審友邦幣制內權吾國金融卓識濟時艱史書平準無雙譜  
上抒政府財源下裕商民福利宏規遺澤遠俎豆馨香百萬家

聯興齋鞋棧



抱經濟鴻猷以試長才已爲銀行開道路  
創金融大業追維往事愧無巨筆誌幽宮

愚弟孟廣深

負經濟宏才總爲讀書明理迄今弓冶相傳子孝孫賢天與厥福  
綜生平事績須知勛業艱難留得典型尙在山頽木壞人何以堪

愚弟孟梅

卽景數年華距花甲尙六年晉祝期頤無量壽

臨風驚噩耗聞蒿歌於一旦空教里巷共生悲

天津富順當

文章經濟負宏才憶曩昔興學理財聲績遠聞到處當局迎倒屣  
道德事業著清評嗟此日曇花薤露神歸太浩一時同志悲招魂

鹽業 大陸 銀行 天津 準備庫  
金城 中南 儲蓄會

經濟佩長才利民裕國敷教樹人事業已千秋大陸蜚聲傳卜式  
剎那驚噩耗望斷燕雲鶴歸淮海文章行萬里春江揮淚哭東坡

弟陳輝德

猗頓富國卜式籌邊他日遇轡軒經濟合登貨殖傳  
叔度虛懷范公尙義一朝聞薤露江淮遽失老成型

愚弟陸錫庚

無忤無爭公道相孚差擬漢書看平準  
惟義惟信典型猶在長留商界作箴銘

駐平大生銀行辦事處孫紹庭

裕國家帑項調社會金融大才磐磐朝野廿年資柱石  
值外患方深痛斯人遽逝余懷渺渺燕雲千里弔英靈

愚弟高孔時

制作侔神明德行動天地

聲華馳異國學識總群流

愚弟劉子元

闔闈著聲華憶昔年聚首燕中平準有書覘碩畫  
朋友感零落悵此日招魂淮上銘幽無筆愧才疎

愚弟吳錫永

廿餘年締造維艱具有經綸堪裕國  
七十日沉緜不起盡無藥石可回生

愚姪李廷墀

創業啓宏圖廣闢金融草野咸能沾實益  
行年逾大衍偶撓疾病蓬瀛何遽賦仙遊

愚弟吳宗濂子匡時及曾孫等

績懋康民蔚爲國器

人懷耆舊痛切山陽

愚弟李汝楫

淮泗毓奇才從來名留貨殖傳

故都繫物望同聲痛悼金融家

諸仲威青來

學同科仕同官交逾三十年甘苦相嘗膾有綈袍憐范叔

我滯東公滯冀耗傳二千里幽明遽隔愧無寶劍答徐君

同學弟張競立

誼切通家情同子姪蒙提攜訓誨殷勤留別懷舊至今欽父執

生當叔世名滿江淮本經濟學問扶植工商觀成何遽返仙鄉

世再姪楊作霖

天未欲中國實業興不憚遺此  
我深爲華北商政痛非哭其私

秦祖澤

經綸裕國一身肩定大計決大疑最傷半世親情腹痛迴車喬太尉  
肝膽照人千古事言必信行必果兼有平生風義典型想像蔡中郎

愚弟黃榮良

齒德俱尊猷執謙恭維族誼  
形神雖逝尙留清白著鄉評

天津慶源和

謹兆源  
張香澤

公抱管鮑才正思我商有賴  
世無扁倉術竟使厥疾不瘳

平行西棧

三十年教養恩深更卹少孤遺摯愛  
一刹那天人永隔難從文字述哀忱

功服姪繼曾

今世歎英才調劑金融歸大陸  
古人同卒歲低徊勳業惜中山

周 莢

平準貨寶

功德昭明

愚弟王景岐

輕重有篇貽哲嗣

淒涼無術起維摩

吳醒亞

經濟冠當時劉晏有才能裕國

榮名傳計學陶朱難繼慨斯人

愚弟  
祝開源  
吳唐偉

經綸有孰能如國豈憂貧泉府收功曾小試  
事業方興未艾胡天不弔人琴隔世痛無常

文鴻恩

經濟裕鑽研本學爲用才如盡其長直追興越計然富齊管仲  
艱難宏締造利國惠民德之感所及其僅三千子弟八百孤寒

愚弟謝祺祥

鷹隼出塵風儀宛在

璠璵歛采朋舊同悲

如小弟徐新六

功業告成一生無憾

勛名卓著千古流芳

賀得霖

近地遠天君子安息

騎龍乘鳳眞人所流

愚弟朱趾祥

具經濟才貨殖應儕史遷傳

存富強志事功遠過亞丹書

愚弟李光啓

余弟兄從遊最初早欽果決英明常聽辨柴愚參魯  
遺艱鉅揚長大去此後盈虛酌劑願繼任蕭規曹隨

如棠濮 祁



廢著鬻財積勞成瘁  
紹述有子常盈不亡

陳行

業擅計陶名標寰宇  
魂歸箕尾世失老成

弟朱鏡宙

計學湛深畢生興利惠民力毅思精成偉業  
丰裁肅穆一日生天成佛志承事述屬佳兒

愚弟胡鳳

經濟匡時江淮毓秀  
詩書裕後蘭玉揚芬

郭德華

擷經濟菁英興中華寶藏

滌淵源家學有繼起賢郎

弟舒石父

膏明以煎井甘先竭

鉢池山遠淮水流長

吳紹曾

冀北仰空羣清望夙推冰壺月

南天傳惡耗春風盼斷薊門烟

愚弟 樂廣榮  
王竹屏

業已展鴻圖卅年間縮穀金融物阜民康推此志

世方不景氣五旬餘溢先朝露人亡國瘁有同悲

弟徐永祚

理財擅特長富國方期資計相

論事見深識濟時何意失通材

愚弟朱藩

壯志在雲霄品學兼優衆口稱賢豈獨我

哀音傳遐邇膏肓莫挽斯人竟死欲呼天

王延松

貨殖有何妨負幹濟經猷小試長才已留典型欽碩望

熱心誰與並綜生平義舉大書往事愧無巨筆誌幽宮

黃振魁

鄉誼重淮南在亂離中去歲弔虞今歲弔君矧聞羯鼓胡笳驚滄海都成劫史  
交情論薊北自睽隔後一晤於平三晤於滬又送孤舟歸櫂歎大江淘盡英雄

鄉愚弟子寶軒

主計才高正賴經綸抒國難  
典型頓失不堪桃李泣春風

北平郁文學院

本學爲用師門貨殖敢追隨  
回想主翁多壯貌  
大業已成經濟規模粗確立  
且憑帳册留遺型

鄭堅

大雅云亡碧水青山誰作主  
老成凋謝落花啼鳥總傷神

周省吾  
高顯儀

晚境履豐亨堂構相承賢喆嗣  
古風敦素樸典型猶憶老成人

愚晚  
嚴兆祖  
宜紀亮

范蠡著奇書欲劑盈虛充武庫

弘羊陳計政要憑綜覈挽頽綱

徐佩璜

事業已歸前輩錄

典型留與後人看

賈成章

翹業世無儔尤幸芝蘭能後起

齊年吾較長詎期松柏竟先零

愚弟王來

負幹濟才猷抱經世學識一生仗義疎財舉動常存名士氣  
爲貨殖大家作金融鉅子平素持躬接物典型猶具古人風

張竹平

天挺英才經國濟民締偉業

老成徂謝江淮雲海盡哀思

李道南  
瞿季剛  
饒紹叔

卓識冠羣倫調劑金融獨關平津新大陸

奇才逢逆症追述往事咸悲江浙老成人

愚弟甯慶韶

數兩淮貨殖人才久與周作翁稱爲並時瑜亮

憶一橋經濟學子應偕吳達老推媿同硯杜房

愚弟  
戴銘禮  
戴正誠

精誠首公典型宛在

仁厚濟世惠澤長存

弟蔣夢麟

大雅云亡風悽紫陌  
哲人萎矣雨泣青郊

弟湯襄

天用如龍規偉業  
詞華賦鵬斬修年

鄭世芬

揮金如土苴大業恢宏息肩未果  
視余猶昆仲舊交零落撒手先歸

姻世愚弟姚兆

主計足匡時武庫勛名思元凱  
致資猶餘事泛舟風度景陶朱

愚弟饒鳳璜

烟雨淒迷蒿里名花凝血淚

音容寂寞清溪流水是哀聲

劉宇振

靜深之學幹達之才損益萬幾蔚成偉業  
富國之謀揀時之策模楷一世詒厥後賢

愚弟蔡元

先生有管商才裕國阜民輔相裁成興大陸  
寰宇失泰斗望承家繼美經論志事付賢郎

愚弟  
姚毓嵩  
孟廣培

度支分部經濟專科更研內政外交教育法律諸大端偉業領金融病榻呻吟尤在念  
碩德堪欽多財善散可合孝友儒林貨殖游俠爲一傳急流胡勇退昊天痛惜不加年

愚弟謝永鏞



縮金融樞紐念餘年擘畫長才著碩望  
嬰痼疾淹纏數閱月續承遺志有傳人

愚弟李 徵

叔陵可擬端木可擬陶朱亦可擬念餘載英氣獨鐘中外傾心空想像  
事業無雙才略無雙經濟又無雙數十年滄桑回首大星忽隕劇悲哀

愚晚柯允唐

蘭氣藹清芬方擬小山發桂

蓉城速仙駕相將一束生芻

厚生銀號 朱介眉  
高煥亭

公不讀古書言行動合於古  
誰能測天命生死順受其天

青島華昌大南紙印刷局

未竟厥施公爲創業興商祖  
倏然待盡我亦浮家蹈海人

愚小弟王毓潤

商通惠市屢調劑金融手創宏規酬素志  
人去空淮泗道遙銀漢淚揮大陸弔丹翁

弟朱綬光

淮泗隕壽星德備鴻籌光義訓  
燕山沉福曜聲淒鶴淚嘆遺型

愚弟章之

鴻湘

興利惠民爲國謀富強統一  
精心毅力其人能勤儉忠誠

龍長惠

經濟長留才優譽  
老成持重仰高風

劉聘三

危局益非死亦是福  
前塵若夢生奚爲情

前海軍部課員趙祖培

厚生利用孔修經濟擅才情學也祿在中矣  
創業垂統可繼艱危留策畫民到于今稱之

世愚弟陳任中率子厚  
堪堂

學宗計然名震大陸  
心傷國難身隱仙鄉

弟高建藩

風雨夜深談往事無慙知己

冰霜凜重任相期不負初衷

姻愚弟王毓霖

知遇詎能忘數年杖履追隨每憶高談貨殖傳  
歸真何太促此日山河破碎那堪遽失理財人

李和

饑溺爲懷先憂後樂

典型在望生榮死哀

韋憲章

溯世交是爲父執溯名分是曰師尊八九年杖履追隨公誼私情均厚我  
論事業未盡完成論春秋未登周甲七十日膏肓痼疾山頽木壞痛斯人

世愚姪朱長年

功同計相足用豐財豈期壯志未伸黯黯燕雲逼間氣  
秀毓淮陰增榮益譽見說旅魂遄返淒淒薤露永哀思

愚弟賈景德

爲國計民生盡瘁

是陶朱端木一流

羅經猷

多難悲中原端賴英才維大陸

儀型延百世愴懷冀北失長城

愚弟鄒敏初

游學返東瀛爲國理財曾記燕京聯舊雨

文星沉南極育才秉鐸空從淮郡仰遺風

愚弟張贊巽

金融大陸賴匡扶星隕京師全國嗟惜  
公益地方資贊助櫬歸故里閤邑悲愴

愚晚  
許葛良  
超

國信賴維持碩畫盡籌公眞健者  
老成驚凋謝鞠躬盡瘁天不憖遺

梁鴻恩

魂返故鄉淒綠水青山千里夢  
棺停蕭寺冷白雲黃葉五更鐘

晚李明山

廿年來調劑金融信用著寔區國計民生胥倚賴  
五旬餘遽歸瑤島忠誠宜福報子賢孫孝慰英靈

姻愚弟陸武

理財有定力治世具長才經濟文章稱絕代  
惠牒示箴言留題多好句雪泥鴻爪感當年

湖心寺範文慧之

何處是丹豁業就名成撒手佛方大隱  
爲人不崖岸利民裕國關心神州陸沉

世愚姪樊鑽

爲國理財國際馳名豈料一朝傾國柱  
哲人其往人才難得從茲千載痛人琴

世愚弟沈昌駿

大雅云亡射水鳴琴悲已杳  
哲人其萎淮山哀笛不堪聞

弟涂鶴臣

爲國善通商酌盈劑虛劉晏素宏經濟學  
教人惟務本持籌握算陶朱自是懋遷才

愚晚  
劉伯衡  
牟君燁

病甫數旬方期逃聽佳音勿藥爰占欣永健  
別逾一載驀地驚傳噩耗連枝誼重痛尤深

總服  
妹社英  
弟凌民

計相才高國資砥柱

謫仙魂返鄉隕福星

世愚弟楊浩公

令德令名羣流皆景仰

裕民裕國大陸著徽聲

王景深



舉院沐仁慈教養兼施兒不憂貧咸樂業  
春風傳惡耗絃歌頓輟會須追悼盡銜哀

淮北貧兒院全體學生

商戰著鞭先才望早曾傾海內  
歲饑輸粟採謳歌今尙滿淮壩

弟田毓璠

鄉望重淮南萬衆同聲稱善士  
金融調冀北四方多難倍思君

世愚弟邵

慎、餘、  
貴、軼、軍、斌

好義急公維護梓鄉孚重望  
持籌握算永嗟幹國失良材

愚晚劉寶謙

掌九府財源頻歲南宣木鐸北領某融締造費經營裕國便民稱巨擘  
歷卅年幻夢一病起自瀕風歌興薤露典型猶在望神州大陸失斯人

愚弟程肇湜

與先兄訂金石至交念卅年契合苔岑風義雲情敦世好  
維我公負鄉國重望慟一旦仙遊蓬島素車白馬弔歸魂

姻世愚弟何煦森率姪如姪維

旭藩相

中外仰遺徽信譽昭垂理財家尊爲泰斗

江淮霑餘蔭哀音逖聽金融界頓失淵源

愚弟朱誦周

大陸經營譽溢寰球噩耗忽驚傳全國嗟惜  
公益贊助利及地方音容空瞻仰闔邑悲惶

愚晚楊汝淦

先人田壤相鄰蔦蘿承蔭小子聯交累世辱附通家羨看登門多士苦思長者豐儀雖關山千里遙違魂夢常馳依杖履

哲嗣箕裘克紹桃李濃陰賤兒親炙高型忝隨絳帳滿期受業良師更仰老成矩矱驚音耗無端飛至精靈從此隔仙凡

世愚晚陳省身率子以

莊霖

經濟貫中西志事終酬能使時賢皆折節  
大名滿南北榮哀俱備那堪骨戚倍愴懷

眷弟丁

錦書  
武  
錦端

瀛島溯征帆更哲嗣象賢破浪乘風逾萬里  
淮流返歸櫂有名人會葬銘旌誌墓耀重泉

姍愚弟周士森

經濟仰名家爲國儲材爲國阜財天胡不憖遺此老

典型貽令範善繼人志善述人事公庶幾雖死猶生

愚弟李漱三

才長計范譽滿鄉邦憐君官政年華遽染沈疴歸大暮  
和緩無靈親朋盡哭愴我家園衰老不堪揮淚向西風

姍弟安 泐

隨侍已十年誰知顛倒夢魂伊於胡底  
違顏經七載可嘆是非莫定徒喚奈何

愚晚李壽鈞

愧樗材忝託葭莩館常隨懿行嘉言懷德澤  
痛藥石難醫心血音容頓杳遺規碩畫想精神

子壻曹懋德率外甥  
源深

卜以決疑醫豈无術心理實難安欲向蒼穹尋父跡

生未承歡死莫贖命音容尤宛在不聞阿爺喚女聲

女英

公私萬端情難自己憂勞竟成疾  
醫藥罔效事有未了精神其長存

愚姊丈孫兆龍

亂世嘆雄才大業艱難靈石同揮蒿蘿淚  
知音悲逝水寸懷長鬱閨中莫慰女嬃哀

妹婿李世桂

三島記同遊姜被春溫風雨鷄鳴常抵足  
一朝悲永訣謝池夢冷津橋鶻語况驚心

功服弟恂

此病竟長歸人間煩惱都成夢

孔懷難寫慟塞上烽烟正滿天

大功服兄綵孫

德望夙崇隆方期杖履追隨常聆教言贈我識

音容今杳渺從此幽明永隔空存懿範繫人思

後學

趙靜仁  
韋健甫

廿餘載化雨時霑道範常親猶憶江南爲學子

千里外吉星遽隕天年不假遙瞻冀北哭先生

受業朱家俊

富國具良謀利其原生桑孔劉楊今再世

愛人多惠澤解衣推食里鄰鄉黨遍含恩

愚晚宋焜

忝爲外兄弟行負笈從游愛我猶通夢寐

追隨諸昆季後登堂問疾痛公已棄塵寰

表弟安棫生

忠誠勤儉是吾師靡敢告勞云胡不瘁

經濟文章爲世冠上而幹國下以傳家

姻小弟費筠農

憶當年兄弟行暮景朝情都成夢幻泡影

看今日子姪輩麻冠素服祇增涕泗滂沱

功服兄徙孫

墾植幾經營蒙伯兄愛護維持造訪常吟花萼集

度支務調劑賴什子整齊劃一積勞迺失棟梁才

金餘公司  
孫倣  
楊晉

爲國通商援古應登貨殖傳

理財有道祇今悵失棟梁才

第四分駐所巡官彭潛

施教如胡文昭尤致力在治事理財美利溥神州詎料多難時竟喪賢者  
得年同葛忠武更盡瘁於民生國計大名垂赤縣定卜明德後必有達人

淮安縣教育局長朱文升

祖國難深胡堪經濟宏才遠弱一个

我公德碩得此飛黃哲嗣應慰九原

世愚姪張叔勻

木壞痛無窮幸有鳳毛能濟美

蘿依嗟失所獨攜鷄酒賦招魂

表叔劉錫爵

木鐸南秉金融北操宣教理財皆偉績



學就東瀛魂歸西土效忠黨國少完人

項吉

蒙養以惠孤寒首倡玉成遂使鄉隅沐恩澤

商戰允推渠帥中堅星隕空教海內想英靈

江北慈幼院全體

承伯兄殷拳雅意護我良多審知誼重鵠鴝爭羨一門皆杞梓  
瞻仲子磊落奇才補天有術可奈夢迷蝴蝶漫將孤詠證池塘

愚晚姜春鐸

調劑金融功在邦國

救助幼稚澤及孤寒

清江濟生分會貧兒院全體

計學有薪傳調劑咸宜社會邦家同倚重

淮流育英物經綸在抱儀型知識共欽崇

宜昌莊諸壩

數年前邀我北遊因事未成行盛意至今猶感戴  
一別後痛公西去好人難再得大家從此失屏幃

世小弟邵格天

文章巨擘經濟偉才商學界推泰斗

勤儉持家忠誠處世淮錫人仰風儀

世晚  
徐白  
劉辛

是東亞圓法專家頻年椽縱金融共仰勤勞宣大陸  
證西域楞嚴慧業一霎遄歸玉闕祇餘哀痛咽長淮

愚弟吳  
牖民  
夢菘  
洪錫  
良裕

當金融枯竭多難危疑之際濟世正需才遽驚兜率上昇痛極山頽傾北斗

感玉成扶掖頻年煦育之恩教人期遠到詎意塵寰永棄悲深圭望感南容

姪壻何炳銓

學優才更優對方外尤多護法  
名重望亦重慨宇內頓失偉人

晚照普

蘭譜契苔岑結卅年如弟如兄一朝撒手  
竹書留簿記傳幾輩賢孫賢子百世流馨

學弟葉爾常

七十日牀褥呻吟事業與家常醫藥雖靈難慰疾  
半百歲弟昆永別傷心遭世變馨香幾瓣忍招魂

期服兄鞠孫

早著祖生鞭咸仰大名垂宇宙

精研猗氏術何期一旦痛人琴

世愚弟潘楚材

上海图书馆藏书



A541 212 0008 1932B



